

# ZAKON O ZAŠTITI TAJNIH PODATAKA (Neslužbeni prečišćeni tekst<sup>1</sup>)

## POGLAVLJE I - OPĆE ODREDBE

### Član 1.

(Predmet Zakona)

Ovim zakonom uređuju se zajedničke osnove jedinstvenog sistema određivanja, pristupa, korištenja, čuvanja i zaštite od neovlaštenog otkrivanja, uništavanja i zloupotrebe tajnih podataka iz nadležnosti Bosne i Hercegovine, entiteta i ostalih nivoa državne organizacije Bosne i Hercegovine koji se odnose na javnu sigurnost, odbranu, vanjske poslove ili obavještajnu i sigurnosnu djelatnost, prestanak tajnosti takvih podataka, te postupak sigurnosne provjere i izdavanje sigurnosne dozvole za pristup tajnim podacima.

### Član 2.

(Primjena Zakona)

Odredbe i rješenja Zakona o zaštiti tajnih podataka (u daljnjem tekstu: Zakon) primjenjivat će se na sve institucije, organe, pravne osobe i građane Bosne i Hercegovine **međunarodne ili regionalne organizacije ukoliko je propisano sporazumom između Bosne i Hercegovine s jedne strane i međunarodne ili regionalne organizacije s druge strane** i dužni su ih se pridržavati državni i entitetski organi, vršioci javnih dužnosti, organi lokalne uprave, organi uprave na svim drugim nivoima vlasti, privredne i druge organizacije i institucije koje u provođenju svojih zakonskih ovlaštenja proizvode, imaju pristup i koriste te podatke, kao i zaposlenici u tim organima, organizacijama i institucijama.

### Član 3.

(Primjena Zakona na druge pravne i fizičke osobe)

(1) U skladu sa Zakonom dužni su postupati i izvođači građevinskih i drugih radova, serviseri informatičke i druge opreme, kao i dobavljači kojima se dostavljaju ti podaci pri obavljanju njihovih poslova.

(2) Svaka osoba kojoj se povjeri tajni podatak ili se na drugi način upozna sa sadržajem tajnog podatka odgovorna je za njegovo čuvanje i zaštitu njegove tajnosti.

---

<sup>1</sup>Neslužbeni prečišćeni tekst sadrži: Zakon o zaštiti tajnih podataka ("Službeni glasnik BiH", broj 54/05) i Zakon o izmjenama i dopunama Zakona o zaštiti tajnih podataka ("Službeni glasnik BiH", broj 12/09) - označen **podebljanim slovima**.

Neslužbeni prečišćeni tekst služi za internu upotrebu i na njega se ne može pozivati prilikom službene upotrebe.

## Član 4.

### (Značenje izraza)

Izrazi korišteni u Zakonu imaju sljedeća značenja:

a) tajni podatak je činjenica ili sredstvo koje se odnosi na javnu sigurnost, odbranu, vanjske poslove ili obavještajnu i sigurnosnu djelatnost Bosne i Hercegovine, koji je potrebno, u skladu s odredbama Zakona, zaštititi od neovlaštenih osoba i koji je ovlaštena osoba označila oznakom tajnosti,

b) tajni podatak druge države, međunarodne ili regionalne organizacije je podatak koji je Bosni i Hercegovini, odnosno njenim nadležnim organima, dostavila druga država, međunarodna ili regionalna organizacija, odnosno njeni organi, očekujući da će taj podatak ostati zaštićen, a karakter tajnog podatka druge države, međunarodne ili regionalne organizacije imaju svi podaci koji su proizvod saradnje Bosne i Hercegovine, odnosno njenih nadležnih organa, s drugom državom ili organima međunarodne ili regionalne organizacije za koje se međusobno dogovori da moraju ostati tajna,

c) dokument je svaki napisan, odštampan, nacrtan, umnožen, fotografiran, snimljen na nosaču informacija, odnosno podlozi, vidljiv ili nekakav drugi zapis tajnog podatka,

d) medij je svako sredstvo koje sadrži tajne podatke,

e) određivanje tajnosti podatka je postupak kojim se taj podatak, u skladu sa Zakonom, određuje kao tajna, s određenim karakterom, stepenom i rokom tajnosti,

f) pristup je postupak upoznavanja osobe s tajnim podatkom ili mogućnost upoznavanja osobe s tajnim podatkom na osnovu dozvole za pristup tajnim podacima,

g) korištenje tajnih podataka je postupak upotrebe takvih podataka od ovlaštene osobe pri obavljanju dužnosti, uz zaštitu izvora i načina dolaska do njih,

h) čuvanje tajnih podataka je propisana procedura održavanja izvornosti podataka i sprečavanje njihovog otkrivanja, uništavanja i zloupotrebe od neovlaštene osobe, organa, sredstava javnog informiranja, organizacije ili institucije,

i) zaštita tajnih podataka je fizička i materijalno-tehnička proceduralna radnja, aktivnost ili postupak s ciljem sprečavanja uništenja, otuđenja ili zloupotrebe tajnog podatka,

j) prestanak tajnosti podatka je zakonita promjena tajnog podatka u podatak koji je dostupan zainteresiranim u skladu s općim propisima koje utvrđuje nadležni organ,

k) sigurnosna provjera osobe je proces koji, prije njenog stupanja na dužnost na kojoj ima ili postoji mogućnost sticanja uvida u tajne podatke, provodi ovlašteni organ čija je obaveza da dođe do podatka o mogućim sigurnosnim smetnjama za obavljanje dužnosti,

l) sigurnosna dozvola je isprava na osnovu koje osoba koja je bila predmet sigurnosne provjere i za koju nema sigurnosnih smetnji stiče uslove za pristupanje, korištenje, zaštitu i čuvanje tajnih podataka,

m) sigurnosne smetnje su podaci ili činjenice do kojih se dođe postupkom sigurnosne provjere i na kojima se zasniva sumnja u povjerenje ili lojalnost osobe koja je predložena za određenu dužnost ili kandidirana za dobivanje sigurnosne dozvole,

n) ugrožavanje integriteta Bosne i Hercegovine je objektivna prijetnja ili čin napada na ustavni poredak, nezavisnost, teritorijalnu cjelovitost, suverenitet, sigurnost, odbrambenu sposobnost i međunarodni subjektivitet Bosne i Hercegovine.

## Član 5.

(Pristup tajnim podacima svih stepena)

(1) Izuzetno od odredbi Zakona, pristup tajnim podacima svih stepena bez sigurnosne provjere, odnosno izdavanja dozvole za pristup tajnim podacima imaju sljedeće osobe:

a) članovi Predsjedništva BiH

**b) poslanici u Predstavničkom domu Parlamentarne skupštine Bosne i Hercegovine i delegati u Domu naroda Parlamentarne skupštine Bosne i Hercegovine**

c) predsjednik i potpredsjednici Federacije BiH i Republike Srpske

d) sudije Suda BiH i Ustavnog suda BiH

e) državni tužilac Bosne i Hercegovine

f) državni pravobranilac Bosne i Hercegovine

g) sudije svih sudova na području Federacije BiH, Republike Srpske i Brčko Distrikta

h) tužioci na svim nivoima u Federaciji BiH, Republici Srpskoj i Brčko Distriktu

i) pravobranioци na svim nivoima u Federaciji BiH, Republici Srpskoj i Brčko Distriktu.

**(2) Lica iz stava (1) ovog člana imaju pristup isključivo tajnim podacima potrebnim za obavljanje njihovih dužnosti.**

**(3) Lica iz stava (1) ovog člana ne mogu zahtijevati pristup tajnim podacima koji se ne odnose na pitanja iz njihove nadležnosti kako su propisane Ustavom, zakonima i propisima.**

**(4) Lica iz stava (1) ovog člana početkom mandata, odnosno pri preuzimanju dužnosti svojeručno potpisuju izjavu o upoznavanju sa Zakonom i drugim odgovarajućim propisima koji uređuju sigurnost tajnih podataka i preuzimaju obaveze postupanja prema tajnim podacima u skladu sa Zakonom i drugim odgovarajućim propisima.**

## Član 6.

(Pristup tajnim podacima stepena INTERNO i POVJERLJIVO)

(1) Pristup tajnim podacima stepena INTERNO i POVJERLJIVO, bez sigurnosne provjere i dozvole, imaju:

a) na nivou Bosne i Hercegovine:

1) predsjedavajući, ministri i zamjenici ministara u Vijeću ministara BiH

2) generalni direktor, zamjenik generalnog direktora i glavni inspektor Obavještajno-sigurnosne agencije BiH

3) direktor i zamjenici direktora Državne agencije za istrage i zaštitu

4) direktor i zamjenici direktora **Granične policije Bosne i Hercegovine**

5) rukovodioci organa, odnosno pravnih osoba, koje su nadležne i obavljaju poslove iz oblasti navedenih u članu 8. Zakona, a nisu posebno navedeni u ovom članu

6) guverner i viceguverner Centralne banke BiH

7) ombudsmen Bosne i Hercegovine.

b) na nivou entiteta Bosne i Hercegovine:

1) premijer vlade i ministri u vladama Federacije BiH i Republike Srpske

2) članovi kolegija zakonodavnih organa Federacije BiH i Republike Srpske

3) poslanici u zakonodavnim organima Federacije BiH i Republike Srpske

4) rukovodioci organa i uprava, odnosno pravnih osoba na svim nivoima u Federaciji BiH i Republici Srpskoj koje su nadležne i obavljaju poslove iz oblasti navedenih u članu 8. Zakona.

c) na ostalim nivoima državne organizacije Bosne i Hercegovine:

- 1) gradonačelnik Brčko Distrikta
- 2) članovi Kolegija Skupštine Brčko Distrikta
- 3) poslanici u Skupštini Brčko Distrikta
- 4) premijer vlade i ministri u vladama kantona
- 5) članovi kolegija zakonodavnih organa kantona
- 6) poslanici u zakonodavnim organima kantona
- 7) gradonačelnici gradova i načelnici općina u Federaciji BiH i Republici Srpskoj
- 8) predsjedavajući zakonodavnih organa gradova i općina u Federaciji BiH i Republici Srpskoj.

(2) Listu institucija i zvaničnika iz stava (1) tačka a) alineja 5) i stava (1) tačka b) alineja 4) ovog člana utvrdit će Vijeće ministara BiH.

(3) Osobe iz stava (1) ovog člana imaju pristup isključivo tajnim podacima potrebnim za obavljanje njihovih dužnosti u skladu sa Zakonom i ne mogu zahtijevati pristup dokumentima koji se ne odnose na pitanja u njihovoj nadležnosti.

#### Član 7.

(Pristup tajnim podacima stepena INTERNO)

(1) Sve osobe koje obavljaju dužnost ili rade u organu imaju pristup tajnim podacima stepena INTERNO.

(2) Osobe iz stava (1) ovog člana početkom mandata, odnosno pri preuzimanju dužnosti svojeručno potpisuju izjavu o upoznavanju sa Zakonom i drugim odgovarajućim propisima koji uređuju sigurnost tajnih podataka i preuzimanju obaveze postupanja prema tajnim podacima u skladu sa Zakonom i drugim odgovarajućim propisima.

#### Član 8.

(Značenje izraza "tajni podatak")

Tajnim se smatra podatak čije bi otkrivanje neovlaštenoj osobi, sredstvima javnog informiranja, organizaciji, instituciji, organu ili drugoj državi, odnosno organu druge države, moglo prouzrokovati ugrožavanje integriteta Bosne i Hercegovine, naročito u oblasti:

- a) javne sigurnosti,
- b) odbrane,
- c) vanjskih poslova i interesa,

d) obavještajnih i sigurnosnih interesa Bosne i Hercegovine,

e) komunikacionih i drugih sistema važnih za državne interese, sudstvo, projekte i planove značajne za odbrambenu i obavještajno-sigurnosnu djelatnost,

f) naučnih, istraživačkih, tehnoloških, privrednih i finansijskih poslova od važnosti za sigurnost funkcioniranja institucija Bosne i Hercegovine, odnosno sigurnosnih struktura na svim nivoima državne organizacije Bosne i Hercegovine.

## Član 9.

### (Odstupanja)

Ne može imati karakter tajnosti onaj podatak kojem se tajnost određuje s namjerom prikrivanja izvršenog krivičnog djela, prekoračenja ili zloupotrebe ovlaštenja, s ciljem prikrivanja bilo koje nezakonitosti ili prikrivanja administrativne greške.

## Član 10.

### (Uslovi za pristup tajnim podacima)

Pristup tajnim podacima moguć je samo uz uslove utvrđene Zakonom i drugim podzakonskim propisima izdatim na osnovu Zakona, odnosno međunarodnim ili regionalnim sporazumima koje je zaključila Bosna i Hercegovina.

## Član 11.

### (Čuvanje tajnosti podataka)

(1) Svi zvaničnici iz člana 5., odnosno člana 6. Zakona, kao i ostali zvaničnici i zaposlenici, koji imaju zakonsko ovlaštenje za pristup tajnim podacima, imaju obavezu čuvati tajnim podatke sve do skidanja oznake tajnosti s njih bez obzira na to kako su do njih došli, a to važi i nakon isteka njihovog mandata, prestanka radnog odnosa, odnosno prestanka obavljanja dužnosti ili članstva u odgovarajućem organu.

(2) Zvaničnici i zaposlenici koji nemaju zakonsko ovlaštenje za pristup tajnim podacima, kao i građani Bosne i Hercegovine koji dođu u posjed ili steknu uvid u tajne podatke, na način koji nije protivan zakonu, preuzimaju obavezu čuvanja podataka iz stava (1) ovog člana.

(3) Osobe iz stava (2) ovog člana obavezne su prijaviti rukovodiocu organa u kojem su zaposleni **agencijama za sprovođenje zakona ili Ministarstvu sigurnosti BiH** neovlašten pristup tajnim podacima i dati izjavu o okolnostima pod kojima su stekle uvid u tajne podatke.

## Član 12.

### (Čuvanje tajnosti podataka druge države, međunarodne i regionalne organizacije)

**(1) Pristup, korištenje, čuvanje i zaštita tajnih podataka druge države, međunarodne ili regionalne organizacije vrši se u skladu sa sporazumom koji se zaključuje između Bosne i Hercegovine i druge države, međunarodne ili regionalne organizacije.**

**(2) Ukoliko određeno pitanje nije regulirano sporazumom iz stava (1) ovog člana, primjenjuje se ovaj zakon i podzakonski propisi izdati na osnovu ovog zakona.**

**(3) Za pristup tajnim podacima iz stava (1) ovog člana potrebne su dozvole koje se izdaju u skladu sa sporazumom iz stava (1) ovog člana i ovim zakonom. Sva lica kojima je za obavljanje svojih dužnosti potreban pristup tajnim podacima iz stava (1) ovog člana moraju proći sigurnosnu provjeru i dobiti dozvolu za pristup tajnim podacima druge države, međunarodne ili regionalne organizacije.**

**(4) Lica koja su u skladu s ovim ili drugim zakonom izuzeta iz sigurnosnog provjeravanja a kojima je za obavljanje njihovih dužnosti potreban pristup tajnim podacima iz stava (1) ovog člana moraju proći sigurnosnu provjeru propisanu sporazumom iz stava (1) ovog člana i ovim zakonom.**

**(5) Sigurnosna provjera iz stava (3) ovog člana obavlja se po postupku propisanom ovim zakonom, ako sporazumom iz stava (1) ovog člana nije drugačije propisano.**

**(6) Vijeće ministara BiH će posebnim propisom, u skladu sa sporazumom iz stava (1) ovog člana i ovim zakonom, regulirati pitanja načina vršenja sigurnosnih provjera za pristup tajnim podacima Bosne i Hercegovine, odnosno tajnim podacima druge države, međunarodne ili regionalne organizacije.**

## POGLAVLJE II - ODREĐIVANJE TAJNOSTI PODATAKA

### Član 13.

(Ovlaštene osobe za određivanje tajnosti podataka stepena INTERNO, POVJERLJIVO I TAJNO)

(1) Tajnost podataka, u skladu sa zakonskim uslovima i procedurom, određuje ovlaštena osoba.

(2) Stepen tajnosti INTERNO, POVJERLJIVO i TAJNO mogu odrediti samo sljedeće ovlaštene osobe:

a) predsjedavajući komisija Parlamentarne skupštine BiH

b) guverner Centralne banke BiH

c) predsjednik Suda BiH i predsjednik Ustavnog suda BiH

d) državni tužilac Bosne i Hercegovine

e) državni pravobranilac Bosne i Hercegovine

f) premijer Federacije BiH i premijer Republike Srpske

g) predsjedavajući zakonodavnih tijela Federacije BiH, Republike Srpske i Brčko Distrikta

h) predsjednici svih sudova na području Federacije BiH, Republike Srpske i Brčko Distrikta

- i) tužioc i na svim nivoima u Federaciji BiH, Republici Srpskoj i Brčko Distriktu
  - j) pravobranioci na svim nivoima u Federaciji BiH, Republici Srpskoj i Brčko Distriktu
  - k) gradonačelnik Brčko Distrikta
  - l) predsjedavajući Skupštine Brčko Distrikta
  - m) premijeri kantona u Federaciji BiH
  - n) predsjedavajući zakonodavnih organa kantona u Federaciji BiH
  - o) rukovodioci organa, odnosno pravnih lica na svim nivoima u Bosni i Hercegovini koja su nadležna i obavljaju poslove iz oblasti navedenih u članu 8. ovog zakona**
  - p) izabrani ili imenovani zvaničnik koji je za određivanje, pristup, korištenje, čuvanje i zaštitu tajnih podataka ovlašten Zakonom, podzakonskim propisima izdatim na osnovu Zakona ili ga je za to pismeno odredila ovlaštena osoba i
  - q) osoba koju je kao zaposlenika tog organa, institucije ili organizacije za to pismeno odredila ovlaštena osoba.
- (3) Ovlaštene osobe iz stava (2) tačke p) i q) ovog člana ne mogu prenositi dobivena ovlaštenja na druge osobe.
- (4) Ovlaštene osobe iz stava (2) ovog člana, ako je to predviđeno Zakonom, moraju imati odgovarajuću dozvolu.
- (5) Vijeće ministara BiH može, uz saglasnost Predsjedništva BiH i nakon konsultacija s generalnim direktorom OSABiH, odlukom dodijeliti pravo određivanja stepena INTERNO, POVJERLJIVO i TAJNO u slučajevima osnivanja novih institucija u Bosni i Hercegovini ili okolnostima značajnim za sigurnost Bosne i Hercegovine.

#### Član 14.

(Ovlaštene osobe za određivanje tajnosti podataka stepena VRLO TAJNO)

- (1) Step en VRLO TAJNO mogu odrediti samo sljedeće ovlaštene osobe:
- a) članovi Predsjedništva BiH
  - b) predsjedavajući Predstavničkog doma i predsjedavajući Doma naroda Parlamentarne skupštine BiH**
  - c) predsjedavajući komisija Parlamentarne skupštine BiH, nadležnih za obavještajna i pitanja odbrane i sigurnosti**
  - d) predsjedavajući i ministri u Vijeću ministara BiH
  - e) generalni direktor Obavještajno-sigurnosne agencije BiH
  - f) direktor Državne agencije za istrage i zaštitu



g) direktor **Granične policije Bosne i Hercegovine**

h) nadležni vojni komandanti koje odredi ministar odbrane BiH

i) predsjednik i potpredsjednici Federacije BiH i Republike Srpske.

(2) Osobe iz stava (1) ovog člana mogu, također, određivati i stepen tajnosti INTERNO, POVJERLJIVO i TAJNO.

(3) Ovlaštene osobe iz stava (2), ovog člana ako je to predviđeno Zakonom, moraju imati odgovarajuću dozvolu.

(4) Vijeće ministara BiH može, uz saglasnost Predsjedništva BiH i nakon konsultacija s generalnim direktorom OSABiH, odlukom dodijeliti pravo određivanja stepena VRLO TAJNO u slučajevima osnivanja novih institucija u Bosni i Hercegovini ili okolnostima značajnim za sigurnost Bosne i Hercegovine.

#### Član 15.

(Određivanje tajnosti podataka u drugim organima)

Proceduru određivanja tajnosti podataka u privrednim organizacijama i zavodima propisuje ministar **sigurnosti BiH**.

#### Član 15a.

(Industrijska sigurnosna dozvola)

(1) Ukoliko postoji mogućnost da će pravno lice imati pristup ili doći u posjed tajnog podatka u okviru poslova stepena POVJERLJIVO i višeg stepena, za koji konkuruje, onda pravno lice podnosi zahtjev Državnom sigurnosnom organu za izdavanje industrijske sigurnosne dozvole.

(2) Zahtjev za izdavanje industrijske sigurnosne dozvole podnosi upravno tijelo pravnog lica ili menadžer za koje je potrebno izdavanje industrijske sigurnosne dozvole.

(3) Uz zahtjev za izdavanje industrijske sigurnosne dozvole predsjednik upravnog tijela pravnog lica ili menadžer podnosi istovremeno zahtjev za izdavanje sigurnosnih dozvola za članove Upravnog tijela i zaposlene koji će raditi na odgovarajućem poslu saglasno listi radnih mjesta.

(4) Upravno tijelo pravnog lica ili menadžer podnosi Državnom sigurnosnom organu popunjen upitnik, koji će biti propisan podzakonskim aktom Vijeća ministara BiH.

(5) Obavještajno-sigurnosna agencija BiH nakon izvršenih sigurnosnih provjera će dostaviti izvještaj o izvršenim provjerama Državnom sigurnosnom organu u kojem će biti ugrađeno mišljenje Obavještajno-sigurnosne agencije BiH o postojanju ili nepostojanju sigurnosnih smetnji za provjeravano pravno lice.

(6) Stepen tajnosti industrijske sigurnosne dozvole odgovarat će nivou lične sigurnosne dozvole članova Upravnog tijela i zaposlenih.

## **Član 15b.**

### **(Zahtjev za obavljanje sigurnosne provjere)**

- (1) Predsjednik Upravnog tijela pravnog lica ili menadžer popunjava zahtjev za obavljanje sigurnosne provjere za pravno lice i podnosi ga Državnom sigurnosnom organu.**
- (2) Sigurnosna provjera o finansijskom stanju za pravno lice obavlja se za period od posljednjih pet godina.**

## **Član 15c.**

### **(Vrijeme važenja industrijske sigurnosne dozvole)**

- (1) Industrijska sigurnosna dozvola, izdaje se pravnom licu za koje se utvrdi da nema sigurnosnih smetnji, a važi pet godina od dana izdavanja.**
- (2) Nakon dobivanja industrijske sigurnosne dozvole, pravno lice je dužno odmah u pisanoj formi obavijestiti Državni sigurnosni organ o bilo kakvim promjenama vezanim za njegovu prijavu za izdavanje sigurnosne dozvole.**
- (3) Promjene vezane za prijavu za izdavanje sigurnosne dozvole koje nastaju tokom provjere, pravno lice je dužno odmah javiti a u svakom slučaju prije izdavanja sigurnosne dozvole.**

## **Član 15d.**

### **(Sadržaj industrijske sigurnosne provjere)**

- (1) Obavještajno-sigurnosna agencija BiH vrši sigurnosne provjere za pravno lice prema dostavljenom upitniku radi dobivanja sigurnosne dozvole pravnog lica i objekata.**
- (2) Prije izdavanja sigurnosne dozvole pravnom licu, Državni sigurnosni organ obavlja certificiranje objekata i time potvrđuje da objekat osigurava i garantira adekvatnu sigurnosnu zaštitu tajnih podataka stepena POVJERLJIVO i viši stepen tajnosti.**
- (3) Radi izdavanja industrijske sigurnosne dozvole pravnom licu obavljaju se sljedeće sigurnosne provjere:**
  - a) Identifikacioni podaci o pravnom licu (naziv, broj i mjesto registracije, godina osnivanja, prethodne registracije, osnovna djelatnost firme, dozvola za rad, poreski broj i broj zaposlenog);**
  - b) ekonomski i finansijski podaci pravnog lica (završni računi pravnog lica u posljednjih pet godina, izvještaji ovlaštenih revizorskih kuća, poslovni odnosi sa stranim partnerima, lista banaka i drugih finansijskih institucija kod kojih su imali račun u posljednje tri godine);**

**c) imovinski podaci o pravnom licu (potraživanja i dugovanja pravnog lica, podaci o netoprihodima i rashodima na kraju finansijske godine posljednje tri godine);**

**d) partnerstvo:**

**1) dominantni predmet poslovanja pravnog lica;**

**2) ime i prezime, adresa (naziv i mjesto registracije) partnera;**

**3) stepen doprinosa svakog partnera s ograničenom odgovornošću;**

**4) pregled stranih partnera u posljednjih pet godina (ime, prezime, državljanstvo, naziv partnera, vrijeme trajanja partnerstva, adresa);**

**5) podaci o poslovnoj netoaktivi/imovini za prethodni finansijski period;**

**6) akcioni kapital/dionice;**

**7) dugovanja.**

**(4) Zavisno od oblika organizovanja pravnog lica, pored provjera koje su utvrđene u stavu (3) ovog člana, vrše se i dodatne provjere za pravno lice koja popunjavaju obrazac koji sadrži:**

**a) Dioničko društvo**

**1) vrijednost poslovne imovine;**

**2) broj, vrsta i nominalna vrijednost dionica/akcija;**

**3) ime, prezime, adresa (naziv, sjedište/mjesto) dioničara koji imaju udio u dionicima preduzeća 25% i više dionica dioničara i njihov procentualni udio u registriranom kapitalu sa izvodom iz registracije preduzeća;**

**4) ime, prezime i adresa članova Nadzornog odbora;**

**5) lista stranih članova upravnog i nadzornog tijela u posljednjih pet godina (ime, prezime, državljanstvo, vrijeme trajanja partnerstva, mjesto i država);**

**6) procentualni udio u kompaniji u kojoj se ispituje preduzeće, a u kojoj je dioničar (broj, vrsta i nabavna cijena podržana izvještajem od dioničarskog računa);**

**7) naplativi dug nakon određenog terećenja njegove odredbe, isplaćivanje naplative sume i datum;**

**8) udio u kapitalu ispitivanog preduzeća u klasifikaciji udjela i dividendi po ličnim emitentima (ime, mjesto, suma udjela u kapitalu).**

**b) Društvo s neograničenom solidarnom odgovornošću**

- 1) ime i prezime osnivača društva i visina uloga osnivača;**
- 2) osnivač preduzeća;**
- 3) vrijednost poslovne imovine;**
- 4) broj, vrsta i nominalna vrijednost dionica/akcija;**
- 5) ime, prezime, adresa (naziv, sjedište/mjesto) dioničara koji imaju udio u dionicima preduzeća 25% i više dionica dioničara i njihov procentualni udio u registriranom kapitalu sa izvodom iz registracije preduzeća;**
- 6) ime, prezime i adresa članova Nadzornog odbora;**
- 7) lista stranih članova upravnog i nadzornog tijela u posljednjih pet godina (ime, prezime, državljanstvo, vrijeme trajanja partnerstva, mjesto i država);**
- 8) procentualni udio u kompaniji u kojoj se ispituje preduzeće, a u kojoj je dioničar (broj, vrsta i nabavna cijena podržana izvještajem od dioničarskog računa);**
- 9) naplativi dug nakon određenog terećenja njegove odredbe, isplaćivanje naplative sume i datum.**

**c) Komanditno društvo**

- 1) ime i prezime članova koji odgovaraju za obaveze društava neograničeno solidarno sa svojom cjelokupnom imovinom;**
- 2) ime i prezime ostalih članova društva koji odgovaraju za obaveze društva do iznosa njegovih uloga upisanih u sudski registar;**
- 3) dominantni predmet poslovanja kompanije;**
- 4) osnivač preduzeća;**
- 5) vrijednost poslovne imovine;**
- 6) broj, vrsta i nominalna vrijednost dionica/akcija;**
- 7) ime, prezime, adresa (naziv, sjedište/mjesto) dioničara koji imaju udio u dionicima preduzeća, 25% i više dionica dioničara i njihov procentualni udio u registriranom kapitalu sa izvodom iz registracije preduzeća;**
- 8) ime, prezime i adresa članova Nadzornog odbora;**
- 9) lista stranih članova upravnog i nadzornog tijela u posljednjih pet godina (ime, prezime, državljanstvo, vrijeme trajanja partnerstva, mjesto i država);**
- 10) podaci o poslovnoj netoaktivi/imovini za prethodni finansijski period;**

11) akcioni kapital/dionice;

12) dugovanja;

13) procentualni udio u kompaniji u kojoj se ispituje preduzeće, a u kojoj je dioničar (broj, vrsta i nabavna cijena podržana izvještajem od dioničarskog računa);

14) naplativi dug nakon određenog terećenja njegove odredbe, isplaćivanje naplative sume i datum.

**d) Društvo s ograničenom odgovornošću**

1) osnivač preduzeća;

2) vrijednost poslovne imovine;

3) broj, vrsta i nominalna vrijednost dionica/akcija;

4) ime, prezime, adresa (naziv, sjedište/mjesto) dioničara koji imaju udio u dionicima preduzeća, 25% i više dionica dioničara i njihov procentualni udio u registriranom kapitalu sa izvodom iz registracije preduzeća;

5) ime, prezime i adresa članova Nadzornog odbora;

6) lista stranih članova upravnog i nadzornog tijela u posljednjih pet godina (ime, prezime, državljanstvo, vrijeme trajanja partnerstva, mjesto i država);

7) podaci o poslovnoj netoaktivi/imovini za prethodni finansijski period;

8) akcioni kapital/dionice;

9) dugovanja;

10) procentualni udio u kompaniji u kojoj se ispituje preduzeće, a u kojoj je dioničar (broj, vrsta i nabavna cijena podržana izvještajem od dioničarskog računa);

11) naplativi dug nakon određenog terećenja njegove odredbe, isplaćivanje naplative sume i datum.

## **Član 15e.**

### **(Žalba na odluku)**

**(1) Protiv odluke Državnog sigurnosnog organa kojom se utvrđuje postojanje sigurnosnih smetnji, može se u roku od 15 dana od dana dostavljanja rješenja kojim se odbija zahtjev za izdavanje industrijske sigurnosne dozvole, izjaviti žalba Komisiji iz člana 14. ovog zakona (u daljnjem tekstu: Komisija).**

**(2) Komisija je dužna u roku od 30 dana od dana dostavljanja žalbe, da donese odluku po žalbi pravnog lica čiji je zahtjev za izdavanje industrijske sigurnosne dozvole odbijen.**

**(3) Protiv odluke Komisije može se tužbom pokrenuti upravni spor kod Suda BiH u roku od dva mjeseca od dana dostavljanja odluke po žalbi.**

#### **Član 15f.**

##### **(Poziv na tender)**

**(1) Poziv na tender u vezi s ugovorima mora sadržavati odredbu koja zahtijeva da pravno lice mora imati sigurnosnu dozvolu, izdatu u skladu sa Zakonom.**

**(2) Državni sigurnosni organ će, tokom trajanja ugovora, nadzirati pridržavanje svih njegovih sigurnosnih odredbi, a bilo koja povreda zakona ili ugovora bit će prijavljena Državnom sigurnosnom organu.**

**(3) Pravno lice koje nije uspjelo na tenderu morat će vratiti svu tendersku dokumentaciju u određenom roku.**

#### **Član 15g.**

##### **(Lista pravnih lica)**

**(1) Državni sigurnosni organ objavit će na internet-stranici listu pravnih lica s tačno određenim identifikacionim oznakama pravnog lica i stepenom tajnosti za koju je izdata industrijska sigurnosna dozvola, s datumom njenog važenja.**

**(2) Lista pravnih lica s datumom važenja industrijske sigurnosne dozvole sadržavat će osnovne identifikacione podatke pravnog lica i datum isteka njegove industrijske sigurnosne dozvole.**

#### **Član 15h.**

##### **(Evidencije)**

**(1) Državni sigurnosni organ vodit će evidencije o sigurnosnim dozvolama izdatim pravnim licima.**

**(2) Sadržaj evidencija bit će propisan podzakonskim aktom Državnog sigurnosnog organa.**

#### **Član 15i.**

##### **(Podzakonski akti)**

**Podzakonskim aktom Vijeća ministara BiH bit će bliže propisane odredbe koje će se odnositi na način izdavanja industrijske dozvole, procedure izdavanja industrijske sigurnosne dozvole, sadržaj i oblik upitnika, evidencije, procedure rada s ugovorima,**

**kao i druge odredbe koje nisu propisane Zakonom, a odnose se na oblast industrijske sigurnosti.**

#### Član 16.

(Prijedlog za određivanje tajnosti podataka)

Svaki zvaničnik, zaposlenik i osoba angažirana u BiH, entitetskom ili organu, instituciji i organizaciji na ostalim nivoima državne organizacije Bosne i Hercegovine obavezni su, u okviru svojih ovlaštenja, procijeniti sigurnosni značaj podataka i predložiti ovlaštenim osobama određivanje tajnosti tih podataka, ako to ocijene potrebnim.

#### Član 17.

(Postupak određivanja tajnosti podataka)

(1) Ovlaštena osoba određuje tajnost podatka u trenutku njegovog nastanka, odnosno na početku aktivnosti organa koji stvara tajni podatak.

(2) Dužnost ovlaštene osobe kod određivanja stepena tajnosti je da donese ocjenu o mogućoj štetnosti za sigurnost Bosne i Hercegovine, odnosno odgovarajuće institucije i organa, ako bi taj podatak bio dostupan neovlaštenoj osobi.

(3) Na osnovu ocjene iz stava (2) ovog člana, podatku se određuje stepen tajnosti i on se označava u skladu s odgovarajućim odredbama Zakona.

(4) Ocjena koja je osnov za određivanje stepena tajnosti mora biti u pisanoj formi.

#### Član 18.

(Ostali slučajevi određivanja tajnosti podataka)

(1) U slučaju kada dva ili više podataka koji, sami po sebi, nemaju karakter tajnosti, ali međusobnim povezivanjem predstavljaju podatak ili dokument koji treba zaštititi, dužnost je ovlaštene osobe da odredi tajnost tog podatka, odnosno dokumenta.

(2) Ako samo manji dio dokumenta, koji tajnost dobiva na način iz stava (1) ovog člana, sadrži tajnost samo u jednom dijelu, ovlaštena osoba dužna je izdvojiti taj dio i s oznakom tajnosti priložiti ga dokumentu.

(3) Ako se tajni podaci koriste pri objedinjavanju, preformuliranju, parafraziranju ili izradi novih tajnih podataka, određuje im se odgovarajuća tajnost.

#### Član 19.

(Stepeni tajnosti)

Tajni podaci iz člana 8. Zakona imaju jedan od sljedećih stepena tajnosti:

- a) VRLO TAJNO određuje se za podatke čije bi neovlašteno otkrivanje ugrozilo integritet Bosne i Hercegovine i nanijelo državi nepopravljivu štetu,
- b) TAJNO se određuje za podatke čije bi neovlašteno otkrivanje nanijelo izuzetno štetne posljedice po sigurnosne, političke, ekonomske ili druge interese Bosne i Hercegovine,
- c) POVJERLJIVO se određuje za podatke čije bi neovlašteno otkrivanje nanijelo štetu sigurnosti ili interesima Bosne i Hercegovine,
- d) INTERNO se određuje za podatke čije bi neovlašteno otkrivanje moglo štetiti djelovanju **državnih**, entitetskih ili organa, organizacija i institucija na ostalim nivoima državne organizacije Bosne i Hercegovine.

## Član 20.

(Međunarodni termini za stepene tajnosti)

- (1) Obaveza svih ovlaštenih osoba je da tajne dokumente označavaju jednim od četiri stepena tajnosti iz člana 19. ovog zakona.
- (2) Pri označavanju stepena tajnosti dokumenata, naročito za dokumente namijenjene saradnji s obavještajnim, odbrambenim ili sigurnosnim institucijama drugih država, međunarodnih ili regionalnih organizacija, mogu se, osim termina iz člana 19. ovog zakona, koristiti termini na engleskom jeziku kako slijedi:
  - a) stepenu VRLO TAJNO odgovara termin "TOP SECRET",
  - b) stepenu TAJNO odgovara termin "SECRET",
  - c) stepenu POVJERLJIVO odgovara termin "CONFIDENTIAL",
  - d) stepenu INTERNO odgovara termin "RESTRICTED".

## Član 21.

(Određivanje najnižeg stepena tajnosti)

- (1) Ovlaštena osoba mora pri određivanju stepena tajnosti odrediti najniži stepen tajnosti koji osigurava zaštitu podatka potrebnog za očuvanje interesa i sigurnosti Bosne i Hercegovine.
- (2) Dokumentu s podacima kojima je ranije bio određen stepen tajnosti mora se odrediti najmanje takav isti stepen i rok tajnosti koji već imaju ti podaci.

## Član 22.

(Ukidanje tajnosti podataka)

- (1) Ovlaštena osoba dužna je ukinuti tajnost podatka kada se za to steknu uslovi određeni Zakonom.



(2) Obrazloženje odluke o ukidanju tajnosti podatka mora biti u pisanoj formi, a to ukidanje tajnosti može zatražiti osoba kojoj je odbijen zahtjev za dobivanje tog podatka, o čemu odlučuje ovlaštena osoba.

#### Član 23.

##### (Promjena stepena tajnosti)

Stepen tajnosti može promijeniti ovlaštena osoba koja je taj stepen odredila kada se za to steknu uslovi utvrđeni Zakonom.

#### Član 24.

##### (Način označavanja tajnih podataka)

(1) Svaki tajni podatak, odnosno svaki dokument koji sadrži tajne podatke mora biti označen:

- a) stepenom tajnosti,
- b) načinom prestanka tajnosti,
- c) podacima o ovlaštenoj osobi, i
- d) podacima o organu, organizaciji ili instituciji čija je ovlaštena osoba odredila tajnost.

(2) Oznake iz stava (1) ovog člana koriste se u skladu s vrstom i karakterom medija, a svaki podatak ili dokument mora se obrađivati kao tajan ako je označen stepenom tajnosti.

(3) Vijeće ministara BiH će posebnim propisom detaljnije regulirati načine i oblike oznaka tajnosti podataka, te fizičke, organizacione i tehničke mjere i postupke za čuvanje tajnih podataka.

#### Član 25.

##### (Prestanak tajnosti podataka)

(1) Tajnost podatka, odnosno dokumenta prestaje:

- a) određenog datuma,
- b) završetkom određenog događaja,
- c) istekom određenog vremena, i
- d) ukidanjem tajnosti od strane ovlaštene osobe.

(2) Ako zbog karaktera sadržaja tajnog podatka nije moguće odrediti način prestanka tajnosti podatka, njegova tajnost prestaje istekom vremena određenog Zakonom o arhivskoj građi ("Službeni glasnik BiH", broj 16/01).

(3) Ovlaštena osoba može promijeniti način i rok za prestanak tajnosti podatka ako za to postoje osnovani razlozi, o čemu se obavezno upoznaju svi oni koji su imali pristup tom podatku.

## Član 26.

### (Negiranje postojanja tajnog podatka)

Ako i sama činjenica priznavanja postojanja određenog tajnog podatka ima štetne posljedice po sigurnost Bosne i Hercegovine i njene interese, Bosna i Hercegovina, entitetski ili organ, organizacija ili institucija na ostalim nivoima državne organizacije Bosne i Hercegovine nisu dužni potvrditi ni negirati postojanje takvog podatka, uprkos zahtjevima zainteresiranih.

## Član 27.

### (Promjena tajnosti podataka)

(1) Zakonski korisnik tajnog podatka može predložiti ovlaštenoj osobi promjenu tajnosti ako smatra da tajnost nije opravdana ili nije na odgovarajući način određena.

(2) Ovlaštena osoba dužna je prijedlog iz stava (1) ovog člana razmotriti i o svojoj odluci obavijestiti predlagачa.

## Član 28.

### (Dostavljanje podataka od drugih država, međunarodnih i regionalnih organizacija)

(1) Tajni podaci druge države, međunarodne ili regionalne organizacije, u pravilu, zadržavaju oznake koje su u upotrebi u toj državi, međunarodnoj ili regionalnoj organizaciji, ali je moguće te podatke označiti i u skladu sa Zakonom pri čemu stepeni i način čuvanja tajnosti podataka moraju biti odgovarajući.

(2) Države, međunarodne ili regionalne organizacije će podatke iz stava (1) ovog člana dostavljati organu koji će odrediti Vijeće ministara BiH. Taj organ obavljat će prijem i postupanje s podacima iz stava (1) ovog člana, te nakon prijema podataka, dostavljat će ih ovlaštenim osobama u institucijama i organima u Bosni i Hercegovini kojima su namijenjeni, o čemu će voditi propisanu evidenciju.

(3) Sporazumima s međunarodnim i regionalnim organizacijama može se odrediti druga institucija za prijem podataka iz stava (1) ovog člana. Institucija određena sporazumom ima obavezu da odredi strukture i osobe na radnim mjestima za prijem tajnih podataka, voditi propisanu evidenciju o tim podacima, te dostavljati mjesečne izvještaje organu iz stava (2) ovog člana.

(4) Ovlaštene osobe u organu iz stava (2), odnosno stava (3) ovog člana moraju imati dozvolu za pristup tajnim podacima stepena VRLO TAJNO.

(5) Ako se podaci iz stava (1) ovog člana dostavljaju putem diplomatsko-konzularnih predstavništava ili misije Bosne i Hercegovine u drugoj državi, međunarodnoj ili regionalnoj organizaciji, posebnim rješenjem odredit će se osoba koja će obavljati poslove dostavljanja.

Ta osoba, kao i šef diplomatsko-konzularnog predstavništva ili misije mora imati dozvolu za pristup tajnim podacima stepena VRLO TAJNO.

#### Član 29.

(Međunarodni sporazumi)

Međunarodnim sporazumima bilateralnog ili multilateralnog karaktera, koje će, u vezi s razmjenom tajnih podataka, Bosna i Hercegovina potpisati s drugim državama, međunarodnim i regionalnim organizacijama, potrebno je odrediti način označavanja tajnih podataka Bosne i Hercegovine u drugim državama, međunarodnim i regionalnim organizacijama koji će osigurati nivo zaštite sigurnosti tih podataka u skladu s odredbama Zakona.

### POGLAVLJE III - SIGURNOSNA PROVJERA I DOZVOLA ZA PRISTUP TAJNIM PODACIMA

#### Član 30.

(Predmet sigurnosnih provjera)

**(1) Lica koja rade ili se prijavljuju za rad na radno mjesto na kojem se proizvode tajni podaci, u organu koji se bavi obavještajnim ili pitanjima iz oblasti odbrane i sigurnosti, bit će predmet osnovnog sigurnosnog provjeravanja u skladu s postupkom za izdavanje dozvole za pristup tajnim podacima stepena POVJERLJIVO.**

(2) Listu organa na koje se odnosi stav (1) ovog člana utvrđuje Vijeće ministara BiH.

(3) U roku od 30 dana od usvajanja liste iz stava (2) ovog člana rukovodilac organa, odnosno institucije upućuje zahtjev za sigurnosnu provjeru iz stava (1) ovog člana Obavještajno-sigurnosnoj agenciji BiH i omogućava joj pristup kompletnoj dokumentaciji potrebnoj za obavljanje sigurnosne provjere.

(4) Sigurnosnu provjeru radi Obavještajno-sigurnosna agencija BiH, koja rezultate sigurnosne provjere, uz svoju preporuku, u koju mogu biti ugrađena mišljenja odgovarajućih organa iz stava (5) ovog člana i člana 56. Zakona, dostavlja rukovodiocu organa u kojem je osoba zaposlena ili obavlja dužnost, odnosno gdje se prijavljuje za radno mjesto. Rukovodilac organa donosi odluku o postojanju odnosno nepostojanju sigurnosne smetnje.

**(5) Obavještajno-sigurnosna agencija BiH dužna je dostaviti rezultate provedene sigurnosne provjere nadležnom rukovodiocu organa, odnosno institucije iz stava (3) ovog člana u roku od 90 dana od dana prijema zahtjeva, uz mogućnost produžetka roka provjere za dodatnih 30 dana. U slučaju potrebe produžetka roka, Obavještajno-sigurnosna agencija BiH obavijestit će nadležnog rukovodioca organa, odnosno instituciju iz stava (3) ovog člana.**

**(6) Postupak sigurnosne provjere bit će obustavljen u sljedećim slučajevima:**

**a) na pismeni zahtjev lica za koje se vrši sigurnosna provjera, a uz povlačenje iz člana 47. stav (1) tačka d) Zakona;**

**b) na pismeni zahtjev nadležnog rukovodioca organa, odnosno institucije iz stava (3) ovog člana.**

(7) U procesu sigurnosne provjere, unutrašnje nadležne strukture organa iz stava (1) ovog člana, ako one postoje, dužne su da sarađuju s Obavještajno-sigurnosnom agencijom BiH.

### **Član 30 a<sup>2</sup>.**

(1) Sigurnosnu dozvolu za pristup tajnim podacima za fizička lica koja su zaposlena u domaćim ili stranih pravnim licima, međunarodnim ili regionalnim organizacijama izdaje Državni sigurnosni organ, odnosno u skladu sa zaključenim međunarodnim sporazumima ako se radi o podacima druge zemlje ili strane organizacije.

(2) Zahtjev za vršenje sigurnosne provjere lica iz stava (1) ovog člana podnosi se Državnom sigurnosnom organu koji će potpune zahtjeve proslijediti Obavještajno-sigurnosnoj agenciji BiH.

(3) Sigurnosna dozvola za pristup tajnim podacima licima iz stava (1) ovog člana izdaje se na osnovu obavljene sigurnosne provjere koju, na zahtjev Državnog sigurnosnog organa, obavlja Obavještajno-sigurnosna agencija BiH koja, u okviru obavljanja sigurnosnih provjera, sarađuje, prema potrebi, s drugim državnim organima i institucijama.

(4) Odluku o postojanju, odnosno nepostojanju sigurnosnih smetnji za lica iz stava (1) ovog člana donosi ministar sigurnosti BiH i dostavlja je rukovodiocu pravnog lica iz stava (1) ovog člana.

### **Član 31.**

#### **(Obavljanje sigurnosnih provjera)**

(1) Sigurnosne provjere za osobe koje konkuriraju za radno mjesto, odnosno dužnost u organu iz člana 30. stav (1) ovog zakona obaviti će se prije imenovanja, postavljenja, odnosno prijema u radni odnos. Osoba za koju se utvrde sigurnosne smetnje neće biti imenovana, postavljena, odnosno primljena u radni odnos za koji je obavljena sigurnosna provjera.

(2) Osoba kod koje se utvrde sigurnosne smetnje za obavljanje dužnosti ili zasnivanje radnog odnosa u organu iz člana 30. stav (1) ovog zakona može uložiti žalbu **Komisiji koju će imenovati Vijeće ministara BiH** u roku od 15 dana od dana dostavljanja obavještenja o postojanju sigurnosnih smetnji. Komisija o žalbi raspravlja i donosi odluku koju dostavlja rukovodiocu organa iz člana 30. ovog zakona.

(3) Rukovodilac će dostaviti odluku Komisije provjeravanoj osobi, u pisanoj formi, u roku od osam dana od dana donošenja.

---

<sup>2</sup>Članom 12. Zakona o izmjenama i dopunama Zakona o zaštiti tajnih podataka ("Službeni glasnik BiH", broj 12/09) dodaje se novi član 30a., koji nema naziv.

(4) Protiv konačne odluke, kojom se utvrđuje sigurnosna smetnja za obavljanje poslova ili dužnosti, može se pokrenuti upravni spor kod nadležnog suda u Bosni i Hercegovini u roku od 30 dana.

(5) Nakon završetka postupka pred nadležnim sudom, osobi kojoj se utvrdi nepostojanje sigurnosne smetnje pripadaju sva prava određena Zakonom.

## Član 32.

### (Status osoba)

(1) Radnopravni status osoba na koje se odnosi član 30. stav (1) ovog zakona ostaje isti danom stupanja na snagu Zakona, sve dok se ne obavi postupak sigurnosne provjere u skladu sa Zakonom.

(2) Osobe kojima je konačnom odlukom nadležnog organa utvrđena sigurnosna smetnja **ili koje su podnijele pismeni zahtjev za obustavu sigurnosne provjere** ne mogu dalje obavljati dužnost, odnosno posao za koji je obavljena **ili obustavljena** sigurnosna provjera.

(3) Na osobe iz stava (2) ovog člana primjenjivat će se odredbe o prekobrojnosti u zakonima koji reguliraju ovu oblast. Izuzetno od odredbi tih posebnih zakona, prekobrojnost u ovom slučaju nastupa kada je i kod osobe konačnom odlukom nadležnog organa utvrđeno postojanje sigurnosne smetnje.

(4) Osobe na koje se odnosi stav (2) ovog člana proglašavaju se prekobrojnim, odnosno stavljaju na raspolaganje kada odluka, u skladu s članom 31. ovog zakona, postane konačna. Nadležni organ za donošenje odluke o prekobrojnosti utvrđeno je posebnim propisom. Iste osobe raspoređuju se isključivo na upražnjena radna mjesta u istoj ili drugoj instituciji, u skladu sa Zakonom. U slučaju nemogućnosti raspoređivanja zbog nepostojanja sličnih radnih mjesta, tim osobama prestaje radni odnos, uz otpremninu utvrđenu Zakonom.

(5) Protiv odluka o proglašavanju prekobrojnim, stavljanju na raspolaganje, premještanju, prestanku radnog odnosa i otpremninama, mogu se primijeniti pravni lijekovi, ako su predviđeni posebnim zakonima koji reguliraju ovu oblast.

(6) Protiv konačnih odluka, donesenih po pravnim lijekovima, mogu se voditi sudski sporovi ako su oni predviđeni posebnim zakonom koji regulira ovu oblast, ali predmet preispitivanja u postupku iz stava (5) ovog člana, i žalbenog i sudskog, ne mogu biti konačne odluke iz čl. 30. i 31. Zakona.

## Član 33.

### (Izuzeće za Oružane snage BiH i policijske organe u BiH)

(1) Izuzetno od odredbi čl. 30. i 31. ovog zakona, osnovnu sigurnosnu provjeru za sljedeće osobe obavljat će unutarnja organizaciona jedinica u Ministarstvu odbrane BiH, koju odredi ministar odbrane BiH:

a) profesionalne vojne osobe u Oružanim snagama BiH

- b) vojnike podofocire i oficire u rezervnom sastavu Oružanih snaga BiH
- c) ostale vojne osobe u Oružanim snagama BiH, u skladu s ovim zakonom
- d) državne službenike, zaposlenike i ostale službenike u institucijama odbrane u Bosni i Hercegovini.

**(2) Izuzetno od odredbi čl. 30. i 31. ovog zakona, osnovnu sigurnosnu provjeru obavljat će Državna agencija za istrage i zaštitu (SIPA) za sljedeća lica:**

- a) policijske službenike i
- b) državne službenike i zaposlenike u policijskim i drugim sigurnosnim organima u Bosni i Hercegovini.

(3) U smislu ovog zakona, sigurnosni organi su:

- a) Ministarstvo sigurnosti BiH,
- b) NCB INTERPOL i
- c) upravne institucije nadležne za obavljanje policijskih poslova u BiH.

(4) Osobe iz stava (1) i (2) ovog člana bit će predmet osnovne sigurnosne provjere, u skladu s postupkom za izdavanje dozvole za pristup tajnim podacima stepena POVJERLJIVO.

(5) Osnovne sigurnosne provjere provedene u skladu s ovim članom mogu biti korištene u svrhu izdavanja dozvole za pristup tajnim podacima stepena POVJERLJIVO, u skladu s ovim zakonom.

#### Član 34.

(Izgled i sadržaj dokumenata)

(1) Za pristup tajnim podacima stepena: POVJERLJIVO, TAJNO i VRLO TAJNO izdaje se dozvola u skladu sa Zakonom.

(2) Izgled i sadržaj dozvole, izjave kao i ostalih dokumenata propisanih Zakonom, ako nije drugačije propisano, utvrdit će državni sigurnosni organ.

(3) Dokumenti iz stava (2) ovog člana imat će odgovarajući stepen tajnosti u skladu sa Zakonom.

#### Član 35.

(Zahtjev za izdavanje dozvole)

(1) Rukovodilac organa u kojem osoba koja je predmet sigurnosne provjere radi, odnosno obavlja dužnost, podnosi zahtjev za izdavanje dozvole ministru sigurnosti BiH, odnosno

ministru odbrane BiH, u skladu s čl. 36. i 37. Zakona. **Rok za izdavanje dozvole je 30 dana od dana prijema rezultata sigurnosne provjere.**

(2) Listu radnih mjesta, odnosno dužnosti za **lica koja su predmet sigurnosne provjere**, odlukom će utvrditi rukovodilac organa iz stava (1) ovog člana i uvrstiti je u sistematizaciju radnih mjesta.

#### Član 36.

(Nadležne osobe za izdavanje dozvola)

(1) **Licima kojima je potreban pristup tajnim podacima dozvolu za pristup tim podacima, u skladu s odredbama ovog i drugih posebnih zakona, izdaje ministar sigurnosti BiH ili po njegovom ovlaštenju zamjenik ministra sigurnosti BiH, uzimajući u obzir mišljenje Obavještajno-sigurnosne agencije BiH u koje mogu biti ugrađena mišljenja odgovarajućih organa iz člana 30. stav (5) i člana 56. ovog zakona.**

(2) Izuzetno od odredbi stava (1) ovog člana i člana 37. stav (1) ovog zakona, osobama kojima je pristup tajnim podacima potreban radi obavljanja dužnosti u Ministarstvu odbrane BiH i drugim civilnim i vojnim strukturama Oružanih snaga BiH, dozvolu za pristup tajnim podacima, u skladu s odredbama Zakona i drugih posebnih propisa, izdaje ministar odbrane BiH, uz saglasnost svojih zamjenika, uzimajući u obzir mišljenje Obavještajno-sigurnosne agencije BiH u koje će biti ugrađena mišljenja relevantnih organa iz člana 30. stav (5) i člana 56. Zakona. **O izdatim dozvolama ministar odbrane BiH mjesečno će obavijestiti Ministarstvo sigurnosti BiH.**

(3) Izuzetno od odredbi stavova (1) i (2) ovog člana te člana 37. stav (1) ovog zakona, dozvolu za pristup tajnim podacima ministru sigurnosti BiH i ministru odbrane BiH izdaje, u skladu sa Zakonom, rukovodilac organa iz člana 75. Zakona.

(4) O izdavanju dozvola iz st. (1) i (2) ovog člana ministar sigurnosti BiH, **dužan je godišnje, a po potrebi i češće, obavijestiti Zajedničku komisiju za nadzor nad radom Obavještajno-sigurnosne agencije Bosne i Hercegovine Parlamentarne skupštine BiH (u daljnjem tekstu: Zajednička komisija).** Zvaničnici iz ovog stava dostavljat će Komisiji izvještaje u pisanoj formi, što ne isključuje podnošenje i usmenih izvještaja pred Komisijom.

(5) **Licima iz člana 5. ovog zakona izdat će se dozvola za pristup tajnim podacima čiji će sadržaj i izgled utvrditi podzakonskim propisom Ministarstvo sigurnosti BiH.**

#### Član 37.

(Izdavanje dozvola za zaposlene u međunarodnim organizacijama)

(1) **Dozvolu za pristup tajnim podacima za državljane BiH zaposlene u stranim preduzećima i međunarodnim organizacijama izdaje Ministarstvo sigurnosti BiH.**

(2) **O izdatim dozvolama iz stava (1) ovog člana ministar sigurnosti BiH dužan je godišnje, a po potrebi i češće, u pisanoj formi obavijestiti Zajedničku komisiju.**

## Član 38.

### (Vrste sigurnosnih provjera)

Zavisno od karaktera tajnih podataka kojima će određena osoba imati pristup prije izdavanja dozvole, ovlašteni zvaničnik osigurat će provođenje:

- a) osnovne sigurnosne provjere za imenovanje na dužnost ili zasnivanje radnog odnosa u organu i izdavanje dozvole za pristup podacima stepena POVJERLJIVO,
- b) proširene sigurnosne provjere za izdavanje dozvole za pristup podacima stepena TAJNO, i
- c) proširene sigurnosne provjere sa sigurnosnim istraživanjem za izdavanje dozvole za pristup podacima stepena VRLO TAJNO.

## Član 39.

### (Osnovna sigurnosna provjera)

(1) Osnovnu sigurnosnu provjeru radi Obavještajno-sigurnosna agencija BiH (u daljnjem tekstu: OSABiH) provjeravajući podatke za osobu naznačenu u osnovnom upitniku za sigurnosnu provjeru.

(2) Podaci iz upitnika, koji je popunila osoba za koju se radi sigurnosna provjera, upoređuju se s podacima iz službene evidencije kojom raspolaže OSABiH, kao i podacima drugih nadležnih državnih organa i ostalih odgovarajućih izvora podataka utvrđenih posebnim pravilnikom, koji donosi Vijeće ministara BiH i koji je usaglašen sa Zakonom.

(3) Ako se u postupku osnovne sigurnosne provjere neke osobe utvrdi sumnja sigurnosne smetnje, OSABiH je dužna dodatno provjeriti podatke koji su razlog sigurnosne smetnje, ali samo uz prethodnu saglasnost provjeravane osobe kojoj se predočava podatak koji je osnova sigurnosne smetnje. U slučaju da se provjeravana osoba saglasi s dodatnim provjerama, ona to potvrđuje popunjavanjem i potpisivanjem prvog dijela dodatnog upitnika. Ako to ne učini, generalni direktor OSABiH **rukovodilac organa koji je podnio zahtjev za obavljanje sigurnosne provjere, obavijestit će ministra sigurnosti BiH.**

## Član 40.

### (Proširena sigurnosna provjera)

(1) Proširenu sigurnosnu provjeru radi OSABiH na osnovu popunjenog osnovnog i posebnog upitnika i podataka drugih organa i izvora, kao i evidencije kojom raspolaže OSABiH.

(2) Ako se kroz postupak proširene sigurnosne provjere utvrdi sumnja sigurnosne smetnje, OSABiH može, ako je potrebno, uz pisanu saglasnost provjeravane osobe, preduzeti mjere daljnje provjere putem svojeručno potpisanog prvog dijela dodatnog upitnika. Međutim, ako provjeravana osoba ne da saglasnost, odnosno ne ispuni i ne potpiše prvi dio dodatnog upitnika, generalni direktor OSABiH obavijestit će osobe nadležne za izdavanje dozvole koje će, na osnovu sumnje sigurnosne smetnje, odbiti izdavanje dozvole za pristup tajnim podacima.



## Član 41.

(Proširena sigurnosna provjera sa sigurnosnim istraživanjem)

(1) Proširenu sigurnosnu provjeru sa sigurnosnim istraživanjem radi OSABiH na osnovu popunjenog osnovnog i posebnog upitnika, te obavljanjem razgovora sa osobama koje je u prvom dijelu dodatnog upitnika naznačila provjeravana osoba i koje mogu podatke iz upitnika potvrditi, odnosno na osnovu provjere navoda u posebnoj izjavi.

(2) Ako se provjerom podataka iz stava (1) ovog člana dovoljno ne razjasni sumnja sigurnosne smetnje, OSABiH može provjeriti podatke o okolnostima sumnje i kod drugih osoba, organa ili organizacija koje mogu pomoći korektnom završetku proširene sigurnosne provjere sa sigurnosnim istraživanjem.

## Član 42.

(Dodatna provjera)

(1) Ako sumnja sigurnosne smetnje proističe iz okolnosti koja se odnosi na bračnog ili vanbračnog partnera, odnosno bilo koju punoljetnu osobu koja živi u zajednici s provjeravanom osobom, ona će ispuniti drugi dio dodatnog upitnika.

(2) Odgovorni zaposlenici OSABiH mogu obaviti razgovor i sa osobama iz stava (1) ovog člana radi razjašnjenja zasnovanosti sigurnosne smetnje, ali samo nakon što oni daju saglasnost za osnovnu sigurnosnu provjeru u pisanoj formi.

(3) Za osnovnu sigurnosnu provjeru i u ovom slučaju provodi se ista procedura precizirana članom 39. ovog zakona.

## Član 43.

(Izdavanje dozvola)

Osobe nadležne za izdavanje dozvola nakon provedene:

- a) osnovne sigurnosne provjere, ako nisu utvrđene sigurnosne smetnje, izdaju dozvolu za pristup tajnim podacima stepena POVJERLJIVO,
- b) proširene sigurnosne provjere, ako nisu utvrđene sigurnosne smetnje, izdaju dozvolu za pristup tajnim podacima stepena TAJNO,
- c) proširene sigurnosne provjere sa sigurnosnim istraživanjem, ako nisu utvrđene sigurnosne smetnje, izdaju dozvolu za pristup tajnim podacima stepena VRLO TAJNO.

## Član 44.

### (Uručivanje i odbijanje izdavanja dozvole)

- (1) Dozvola iz člana 43. ovog zakona uručuje se provjeravanoj osobi, a o izdavanju dozvole u pisanoj formi obavještava se rukovodilac organa, organizacije ili institucije koji je uputio zahtjev za sigurnosnu provjeru.
- (2) Ako osobe nadležne za izdavanje dozvola, na osnovu potvrđene sigurnosne smetnje, odbiju izdati dozvolu za pristup tajnim podacima, dužne su provjeravanoj osobi navesti razloge sigurnosne smetnje. Izvore i načine sigurnosne provjere osobe nadležne za izdavanje dozvola nisu obavezne obrazlagati.

## Član 45.

### (Žalbeni postupak)

- (1) Protiv rješenja osoba nadležnih za izdavanje dozvola, kojima je odbijen zahtjev za izdavanje dozvole za pristup tajnim podacima, provjeravana osoba može u roku od 15 dana od dana dostavljanja rješenja uložiti žalbu **Komisiji koju će imenovati Vijeće ministara BiH**. Komisija o žalbi raspravlja i donosi odluku koju dostavlja nadležnoj osobi koja je odbila zahtjev za izdavanje dozvole. Osoba nadležna za izdavanje dozvole dostavit će odluku Komisije provjeravanoj osobi, u pisanoj formi, u roku od osam dana od dana donošenja.
- (2) Protiv konačne odluke kojom se odbija izdavanje dozvole za pristup tajnim podacima može se pokrenuti upravni spor kod Suda BiH u roku od 30 dana.
- (3) Podnošenje žalbe ili pokretanje upravnog spora ne zadržava izvršenje rješenja iz stava (1) ovog člana.
- (4) Nakon završetka postupka pred nadležnim sudom, osobi kojoj se utvrdi nepostojanje sigurnosne smetnje pripadaju sva prava utvrđena Zakonom.

## Član 46.

### (Saradnja u postupku sigurnosnih provjera)

- (1) OSABiH i drugi nadležni organi, organizacije i institucije Bosne i Hercegovine mogu u postupku sigurnosne provjere određene osobe sarađivati, u skladu s potpisanim sporazumom s drugom državom, međunarodnom ili regionalnom organizacijom, uz uvažavanje odredbi propisa Bosne i Hercegovine, koji se odnose na zaštitu ličnih podataka, kao i odgovarajućih odredbi Zakona o Obavještajno-sigurnosnoj agenciji BiH ("Službeni glasnik BiH", br. 12/04 i 20/04).
- (2) **OSABiH i drugi nadležni organi u postupku obavljanja sigurnosnih provjera za lica koja su boravila u inozemstvu duže od tri mjeseca, ukoliko s odnosnom državom nema zaključen međunarodni sporazum, mogu izvršiti provjeru i provjeravati podatke na osnovu saradnje sa institucijama, poslodavcima, sudovima, tužilaštvima i drugim nadležnim državnim, entitetskim i drugim organima u BiH.**

## Član 47.

### (Formalni preduслови za sigurnosnu provjeru)

(1) Prije početka sigurnosne provjere, rukovodilac će preduzeti aktivnosti kako bi osobe koje su predmet sigurnosne provjere prethodno:

- a) upoznao s propisima iz oblasti obrade tajnih podataka,
- b) upoznao s obavezom dobivanja dozvole za pristup tajnim podacima odgovarajućeg stepena,
- c) upoznao sa sadržajem sigurnosne provjere i postupkom za dobivanje dozvole,
- d) osigurao da provjeravana osoba da pismenu saglasnost za provjeru, ispuni odgovarajući upitnik, svojeručno potpiše izjavu da je upoznata s propisima koji uređuju obradu tajnih podataka i obaveže se da će postupati u skladu s navedenim propisima.

(2) Osobe koje su predmet sigurnosne provjere ne mogu se pozivati na neispunjavanje obaveza iz tač. a), b) ili c) stava (1) ovog člana kako bi spriječile ili dovele u pitanje sigurnosnu provjeru.

## Član 48.

### (Vrste upitnika)

Odgovarajući sigurnosni upitnik iz člana 47. stav (1) tačka d) ovog zakona za dobivanje dozvole za pristup tajnim podacima pojedinih stepena tajnosti je:

- a) osnovni upitnik za dobivanje dozvole za pristup tajnim podacima stepena **POVJERLJIVO**,
- b) osnovni i posebni upitnik za dobivanje dozvole za pristup tajnim podacima stepena **POVJERLJIVO i TAJNO** i
- c) osnovni, posebni i prvi dio dodatnog upitnika za dobivanje dozvole za pristup tajnim podacima stepena **POVJERLJIVO, TAJNO i VRLO TAJNO**.

## Član 49.

### (Sadržaj osnovnog upitnika)

Osnovni upitnik sadrži sljedeće podatke:

- a) ime i prezime uključujući i prijašnja,
- b) jedinstveni matični broj (JMB),
- c) datum i mjesto rođenja,
- d) državljanstvo, odnosno državljanstva uključujući i ranija,

- e) adresu boravka (prebivalište i boravište),
- f) boravak u inozemstvu ako je trajao duže od tri mjeseca,
- g) bračno stanje, lične podatke bračnog ili vanbračnog partnera i punoljetne osobe koji žive u zajednici s provjeravanom osobom,
- h) stručnu spremu, stečeno zvanje i posao kojim se bavi,
- i) dosadašnje poslodavce i njihove adrese,
- j) služenje vojnog roka i angažman u oružanim snagama ili drugim naoružanim formacijama,
- k) školovanje i učešće na seminarima ili drugim oblicima obrazovanja i usavršavanja u inozemstvu ako su trajala duže od tri mjeseca,
- l) pravosnažne presude zbog krivičnih djela, odnosno rješenja o prekršajima iz sadržaja Zakona,
- m) tekuće sudske procese,
- n) ovisnost o alkoholu, drogi i drugi oblici ovisnosti,
- o) kontakte sa stranim sigurnosnim ili obavještajnim službama,
- p) članstvo ili saradnja s organizacijama koje zagovaraju terorizam i druge protuustavne načine promjene ustavnog poretka Bosne i Hercegovine,
- q) izrečene disciplinske mjere u posljednje dvije godine zbog kršenja propisa o obradi tajnih podataka,
- r) ranije sigurnosne provjere u skladu s tadašnjim zakonima, i
- s) ranije sigurnose provjere u skladu s odredbama Zakona,
- t) imovno stanje provjeravane osobe i osoba iz tačke g) ovog stava.

#### Član 50.

#### (Sadržaj posebnog upitnika)

Posebni upitnik sadrži sljedeće podatke:

- a) učešće u stranim oružanim snagama ili drugim naoružanim formacijama,
- b) poreski broj,
- c) finansijske obaveze i preuzete garancije,

d) osobine, sklonosti i okolnosti iz života koje mogu biti motiv za ucjenjivanje ili druge oblike pritisaka na provjeravanu osobu.

#### Član 51.

(Sadržaj dodatnog upitnika)

Dodatni upitnik sastoji se iz dva dijela:

a) navođenje imena, prezimena i adresa tri osobe koje mogu potvrditi navode iz upitnika, a ne mogu biti osobe iz člana 49. stav (1) tačka g) ovog zakona ili, ako provjeravana osoba iz opravdanih razloga nije u mogućnosti navesti tražena imena, davanje posebne izjave o razlozima nemogućnosti, te o svim pitanjima koja od nje traži OSABiH ili osobe nadležne za izdavanje dozvole koju će te osobe uzeti u obzir pri donošenju rješenja o izdavanju dozvole,

b) podaci o osobama iz člana 49. stav (1) tačka g) ovog zakona za koje se može uraditi sigurnosna provjera u skladu sa Zakonom.

#### Član 52.

(Obaveze pri ispunjavanju upitnika)

Osobe koje ispunjavaju upitnike iz čl. 49., 50. i 51. ovog zakona obavezne su dati tačne i detaljne odgovore na sva pitanja iz upitnika. U slučajevima kada na pitanje nemaju šta odgovoriti, osobe će, pod punom zakonskom odgovornošću, napisati da nemaju ništa izjaviti u vezi s tim pitanjem.

#### Član 53.

(Period sigurnosne provjere)

**(1) Podaci iz osnovnog, posebnog i dodatnog upitnika za prvu sigurnosnu provjeru u postupku izdavanja dozvole za pristup tajnim podacima stepena POVJERLJIVO, TAJNO i VRLO TAJNO nema vremenskog ograničenja.**

(2) Svaka sljedeća Zakonom obavezna sigurnosna provjera podataka u postupku izdavanja dozvole za pristup tajnim podacima stepena POVJERLJIVO obuhvata period od posljednjih deset godina, a za dozvole za pristup tajnim podacima stepena TAJNO i VRLO TAJNO obuhvata period od posljednjih pet godina.

#### Član 54.

(Ljekarski pregled)

(1) Ako se postupkom sigurnosne provjere utvrdi sumnja u ovisnost o alkoholu, drogi ili drugi neprimjereni oblici ovisnosti, **rukovodilac organa** može pisanim aktom uputiti provjeravanu osobu na obavljanje ljekarskog pregleda u nadležnu instituciju.

(2) Ako provjeravana osoba ne prihvati prijedlog iz stava (1) ovog člana, osoba nadležna za izdavanje dozvole donijet će rješenje o odbijanju izdavanja dozvole za pristup tajnim podacima.

#### Član 55.

(Pravo zadržavanja tajnosti izvora podataka)

(1) OSABiH, odnosno osobe nadležne za izdavanje dozvola, nisu dužne predočavati podatke o nelegalnoj saradnji provjeravane osobe sa stranim obavještajnim i sigurnosnim službama ako bi to ugrožavalo izvore, načine dolaska do podataka i postupak njihove provjere.

(2) Podaci iz stava (1) ovog člana predočavaju se u žalbenom postupku Sigurnosno-obavještajnoj komisiji za nadzor nad radom OSABiH Parlamentarne skupštine BiH, odnosno sudiji suda u Bosni i Hercegovini u postupku sudskog spora, ako je to potrebno.

(3) Osobe iz stava (2) ovog člana moraju posjedovati odgovarajuću dozvolu u skladu sa Zakonom.

#### Član 56.

(Saradnja s drugim nadležnim organima)

(1) Određene podatke iz osnovnog, posebnog i dodatnog upitnika, pored svojih operativnih saznanja i evidencija, OSABiH će provjeravati, putem saradnje s poslodavcima, sudovima, tužilaštvima, strukturama u Oružanim snagama BiH, policijskim organima u Bosni i Hercegovini, kao i poreskim, carinskim i ostalim nadležnim državnim, entitetskim i drugim organima.

(2) Organi iz stava (1) ovog člana dužni su sarađivati sa OSABiH u procesu provođenja Zakona.

(3) Organi iz stava (1) ovog člana su, također, dužni u procesu sigurnosne provjere sarađivati s organima iz člana 33. ovog zakona.

#### Član 57.

(Dodatna provjera u slučaju sumnje sigurnosne smetnje)

(1) Ako je protiv osobe, koja već ima dozvolu za pristupanje tajnim podacima, pokrenut disciplinski postupak zbog kršenja propisa koji reguliraju obradu tajnih podataka ili je protiv te osobe pokrenut krivični postupak zbog sumnje izvršenja krivičnog djela ili je utvrđena osnovana sumnja sigurnosne smetnje u skladu s odredbama Zakona, rukovodilac organa, organizacije ili institucije u kojoj je provjeravana osoba angažirana na poslovima pristupanja, korištenja, čuvanja i zaštite tajnih podataka dužan je o tome obavijestiti osobe nadležne za izdavanje dozvole.

(2) Osobe nadležne za izdavanje dozvola, ako se procijeni postojanje osnovane sumnje, uputit će zahtjev OSABiH za dodatnu sigurnosnu provjeru.

(3) U slučaju iz stava (1) ovog člana nije potrebna posebna saglasnost provjeravane osobe, ali je, odmah nakon početka postupka dodatne sigurnosne provjere, dužnost rukovodioca toj osobi privremeno, do završetka postupka, onemogućiti pristup tajnim podacima, o čemu se donosi rješenje.

#### Član 58.

(Ponovna sigurnosna provjera nakon dobivanja dozvole)

(1) Osobu, koja ima pristup tajnim podacima stepena POVJERLJIVO, obavezno je sigurnosno provjeravati svakih deset godina, a osobu koja ima pristup tajnim podacima stepena TAJNO i VRLO TAJNO sigurnosno provjeravati najmanje svakih pet godina.

2) Postupak ponovne provjere isti je kao i postupak prve provjere, ako nije zakonom ili međunarodnim sporazumom Bosne i Hercegovine i druge države, međunarodne ili regionalne organizacije, drugačije određeno.

(3) Ako u novoj sigurnosnoj provjeri OSABiH utvrdi sigurnosne smetnje, osobe nadležne za izdavanje dozvole donijet će rješenje o oduzimanju dozvole i o tome obavijestiti provjeravanu osobu i rukovodioca državnog organa, organizacije ili institucije u kojoj ta osoba ima pristup tajnim podacima.

(4) Od trenutka dobivanja rješenja iz stava (3) ovog člana rukovodilac je dužan spriječiti pristup tajnim podacima osobi kojoj je oduzeta dozvola.

#### Član 59.

(Sigurnosne smetnje)

(1) Sigurnosne smetnje, zbog kojih se odbija izdavanje dozvole za pristup tajnim podacima, su:

a) dokazano lažno navođenje podataka u upitniku za provjeru,

b) pravosnažne sudske presude od najmanje tri mjeseca zatvorske kazne,

c) postojanje jednog ili više pravosnažnih rješenja zbog prekršaja iz člana 49. tačka l) Zakona,

d) vođenje postupka zbog krivičnih djela za koje se mogu izreći zatvorske kazne u trajanju od najmanje tri mjeseca,

e) vođenje postupka pred Međunarodnim tribunalom za ratne zločine počinjene na području bivše Jugoslavije, odnosno pred odgovarajućim sudom u Bosni i Hercegovini,

f) dokazano postojanje sigurnosne smetnje u vezi s jednom ili više informacija iz upitnika za sigurnosnu provjeru, koje utemeljuju opravdanu sumnju u autentičnost, lojalnost državi i povjerljivost osobe za omogućavanje pristupa, korištenja, čuvanja i zaštite tajnih podataka, a naročito sljedeće:

- 1) neovlašten kontakt s pripadnicima organiziranih kriminalnih grupa, terorističkim organizacijama i organizacijama koje ih finansijski ili na drugi način podržavaju, odnosno članstvo u njima,
  - 2) neovlašteni kontakt ili saradnja s osobama iz obavještajno-sigurnosnih ili vojnih struktura drugih država,
  - 3) iznošenje ili komentiranje tajnih informacija, dokumenata i aktivnosti neovlaštenim osobama, a naročito obavještajno-sigurnosnim službama drugih država ili sredstvima javnog informiranja,
  - 4) prekomjerna zaduženost koja dovodi do finansijskih teškoća i predstavlja dokazanu mogućnost za ucjenu ili druge oblike pritisaka na provjeravanu osobu,
  - 5) dokazano neobjašnjivo bogaćenje iz nepoznatog ili izvora koji je povezan s organizacijama iz alineja 1) i 2) tačke f) ovog stava,
  - 6) odbijanje pružanja odgovora ili informacija ili dokazano sprečavanje drugih da pruže odgovore ili informacije koje zahtijevaju OSABiH, osobe nadležne za izdavanje dozvola ili Komisija.
- g) postojanje drugih sigurnosnih smetnji određenih Zakonom ili međunarodnim sporazumima.
- (2) Dokaze za sigurnosne smetnje iz stava (1) ovog člana dužna je prikupiti i iznijeti OSABiH u saradnji s odgovarajućim organima iz člana 30. stav (5) i člana 56. ovog zakona.

#### Član 60.

##### (Evidencije)

- (1) Rukovodioci organa, organizacija i institucija Bosne i Hercegovine, entiteta i ostalih nivoa državne organizacije Bosne i Hercegovine pohranjuju evidenciju o dozvolama i podatke, prikupljene tokom sigurnosne provjere, u poseban dio kadrovskih dosjea, a koja se može koristiti isključivo u vezi s odredbama Zakona, odnosno provedbenim propisima donesenim na osnovu njega.
- (2) Odgovorne osobe iz stava (1) ovog člana odgovorne su za sigurnost i zaštitu evidencije iz stava (1) ovog člana.

#### Član 61.

##### (Primjena propisa u slučaju oduzimanja dozvole)

- (1) Kada osobi koja ima pravo pristupa tajnim podacima bude oduzeta dozvola od strane osoba nadležnih za izdavanje dozvole, ona se proglašava prekobrojnomo, odnosno stavlja na raspolaganje s danom kada odluka, u skladu s članom 45. ovog zakona, postane konačna. Prekobrajna osoba raspoređuje se isključivo na upražnjena radna mjesta u istoj ili drugoj instituciji, u skladu sa Zakonom. U slučaju nemogućnosti raspoređivanja, zbog nepostojanja sličnih radnih mjesta, toj osobi prestaje radni odnos uz otpremninu utvrđenu Zakonom.



(2) Na osobu iz stava (1) ovog člana primjenjivat će se odredbe kojima je utvrđena prekobrojnost u zakonima koji reguliraju ovu oblast. Izuzetno od odredbi tih posebnih zakona, prekobrojnost u ovom slučaju nastupa i kada je kod osobe konačnom odlukom nadležnog organa utvrđeno postojanje sigurnosne smetnje.

(3) Protiv odluka o proglašavanju prekobrojnim, stavljanju na raspolaganje, premještanju, prestanku radnog odnosa i otpremninama mogu se izjavljivati žalbe, prigovori ili zahtjevi za preispitivanje ako su oni predviđeni posebnim zakonima.

(4) Protiv konačnih odluka po žalbama, prigovorima ili zahtjevima za preispitivanje mogu se voditi sudski sporovi ako su oni predviđeni posebnim zakonom, ali predmet preispitivanja u postupku iz stava (3) ovog člana, i žalbenog i sudskog, ne mogu biti konačne odluke iz čl. 36. i 37. ovog zakona.

## Član 62.

### (Centralni registar i čuvanje podataka)

(1) Vijeće ministara BiH donosi odluku o uspostavljanju Centralnog registra u kojem se vodi službena evidencija o izdatim dozvolama za sve osobe koje imaju pravo pristupa tajnim podacima stepena POVJERLJIVO, TAJNO i VRLO TAJNO.

(2) Evidencije o izdatim dozvolama iz stava (1) ovog člana imaju sljedeće podatke:

a) ime, prezime, JMB, datum, mjesto i država rođenja, državljanstvo osobe,

b) organ u kojem je osoba zaposlena,

c) stepen tajnosti do kojeg osoba ima pravo pristupa,

d) konstatacije o ponovnim sigurnosnim provjerama,

e) broj, datum izdavanja i datum prestanka važenja dozvole,

f) saglasnost za sigurnosnu provjeru u pisanoj formi i

g) druge dokumente u vezi sa sigurnosnom provjerom.

(3) Svi podaci koji se odnose na sigurnosnu provjeru čuvaju se onoliko dugo koliko važi sigurnosna dozvola, odnosno za vrijeme u kojem osoba ima pravo pristupa tajnim podacima, a nakon toga s podacima se postupa u skladu sa zakonima koji reguliraju pitanje zaštite ličnih podataka.

(4) Dokumenti iz stava (1) ovog člana za osobe koje nisu prošle sigurnosnu provjeru, odnosno kojima nije izdata dozvola bit će pohranjivani u evidencijama iz člana 60. ovog zakona.

**(5) Centralni registar odgovoran je za prijem, evidenciju, rukovanje i distribuciju tajnih podataka određenog stepena koji se razmjenjuju s drugom državom, međunarodnom ili regionalnom organizacijom.**

**(6) Svaki organ može uz prethodnu certifikaciju Državnog sigurnosnog organa uspostaviti podregistar koji će biti odgovoran za prijem, evidenciju i rukovanje tajnim podacima koji se dostave tom organu od Centralnog registra.**

**(7) Sva pitanja koja se odnose na prijem, evidenciju, rukovanje i distribuciju između Centralnog registra i podregistra bit će regulirana posebnim aktom koji donosi ministar sigurnosti BiH.**

#### Član 63.

(Privremeni pristup tajnim podacima)

(1) Privremeno **u izuzetnim situacijama** može određenoj osobi koja ima dozvolu omogućiti pristup tajnim podacima za jedan stepen tajnosti iznad onoga na koji ta osoba ima pravo.

(2) Pristup iz stava (1) ovog člana omogućava se na osnovu zahtjeva rukovodioca koji se u pisanoj formi upućuje osobama nadležnim za izdavanje dozvole, uz obrazloženje neophodnosti i ograničenje na samo one podatke koji su potrebni za provođenje određene aktivnosti, ali ta privremenost može trajati najduže tri mjeseca.

### POGLAVLJE IV - PRISTUP TAJNIM PODACIMA I NJIHOVO ČUVANJE

#### Član 64.

(Pravo pristupa tajnim podacima)

(1) Pravo pristupa tajnim podacima stepena tajnosti određenog u dozvoli pri obavljanju dužnosti ili u okviru radnih zadataka imaju samo osobe koje su dobile dozvolu od osoba nadležnih za izdavanje dozvola.

(2) Niko ne smije tražiti tajni podatak prije i u većem obimu nego što je potrebno za obavljanje dužnosti ili radnih zadataka.

#### Član 65.

(Raspolaganje tajnim podacima)

Tajni podaci mogu se drugim državnim, entitetskim ili organima na ostalim nivoima državne organizacije Bosne i Hercegovine, koji postupaju po Zakonu, odnosno ovlaštenim zaposlenicima u tim organima, staviti na raspolaganje samo na osnovu **pismene saglasnosti** rukovodioca organa koji je odredio tajnost.

#### Član 66.

(Uslovi razmjene tajnih podataka)

Ovlaštena osoba može tajne podatke proslijediti državnom, entitetskom, te organu, organizaciji ili instituciji na ostalim nivoima državne organizacije Bosne i Hercegovine, kao i pravnim i fizičkim osobama iz člana 3. stav (1) ovog zakona samo pod uslovom da:

- a) korisnik tih tajnih podataka ispunjava fizičke, organizacione i tehničke uslove za čuvanje tajnih podataka u skladu sa Zakonom i provedbenim propisima usaglašenim sa Zakonom,
- b) osobe koje će pristupati tajnim podacima imaju dozvolu odgovarajućeg nivoa za to,
- c) ovlaštene osobe, uz dobivenu dozvolu, potpišu pismenu izjavu da su upoznate sa Zakonom, drugim odgovarajućim propisima i ako se obavežu da će tajne podatke koristiti u skladu s navedenim propisima,
- d) državni organ, organizacija ili institucija garantiraju da će pristup tajnim podacima biti omogućen samo ovlaštenim osobama kojima je to potrebno radi obavljanja službene dužnosti.

#### Član 67.

##### (Ograničenja razmjene tajnih podataka)

Zakonski korisnik koji od ovlaštene osobe dobije tajni podatak ne smije ga bez saglasnosti stavljati na raspolaganje drugim korisnicima, osim u slučajevima utvrđenim Zakonom i provedbenim propisima.

#### Član 68.

##### (Nadzor i evidencija)

Ovlaštena osoba mora imati stalni nadzor nad distribucijom tajnih podataka i mora voditi ažurnu propisanu evidenciju iz koje će biti očigledno kada i ko se s tajnim podatkom upoznao.

#### Član 69.

##### (Postupak čuvanja tajnih podataka)

(1) U svakom državnom, entitetskom i organu, organizaciji ili instituciji na ostalim nivoima državne organizacije Bosne i Hercegovine, koja je korisnik tajnih podataka, mora se, u skladu sa Zakonom i na njemu zasnovanim provedbenim propisima, uspostaviti sistem postupaka i odluka značajnih za čuvanje tajnih podataka koji je usaglašen sa stepenom tajnosti i koji garantira onemogućavanje neovlaštenog otkrivanja tih podataka.

(2) Postupci iz stava (1) ovog člana moraju sadržavati, ali ne ograničavajući se samo na njih, sljedeće:

- a) opće sigurnosne odluke,
- b) zaštitu osoba koje imaju pristup tajnim podacima,
- c) zaštitu prostorija,
- d) zaštitu dokumenata i medija koji sadrže tajne podatke,
- e) zaštitu komunikacija putem kojih se prenose tajni podaci,

- f) način označavanja stepena tajnosti,
- g) zaštitu opreme kojom se obrađuju tajni podaci,
- h) način upoznavanja korisnika s odlukama i postupcima zaštite tajnih podataka,
- i) nadzor i evidentiranje pristupa tajnim podacima,
- j) nadzor i evidentiranje slanja i distribucije tajnih podataka.

#### Član 70.

##### (Mjere i postupci zaštite tajnih podataka)

- (1) Tajni podaci moraju se čuvati na način koji osigurava da pristup tim podacima imaju samo oni koji raspolažu dozvolom za pristup tajnim podacima odgovarajućeg nivoa i kojima su ti podaci potrebni pri obavljanju njihovih dužnosti i radnih zadataka.
- (2) Izvan prostorija korisnika tajni podaci mogu se slati samo uz poštivanje zaštitnih mjera i postupaka koji garantiraju da će do podataka doći samo osobe koje imaju dozvolu odgovarajućeg nivoa.
- (3) Postupke i odluke u vezi sa zaštitom slanja tajnih podataka donose odgovorni rukovodioci u skladu sa stepenom tajnosti tih podataka, s tim da to slanje ne smije biti obavljeno putem nezaštićenih komunikacionih sredstava.
- (4) Vijeće ministara BiH detaljnije propisuje fizičke, organizacione i tehničke mjere i postupke zaštite tajnih podataka i dokumenata posebnim propisom iz člana 24. ovog zakona.

#### Član 71.

##### (Postupak u slučaju nestanka, uništenja ili neovlaštenog otkrivanja)

- (1) Zvaničnici, državni službenici i drugi zaposlenici u državnim, entitetskim, te organima, organizacijama i institucijama na ostalim nivoima državne organizacije Bosne i Hercegovine, koji utvrde da se dogodio nestanak, uništavanje ili neovlašteno otkrivanje tajnih podataka, obavezni su o tome odmah obavijestiti ovlaštenu osobu.
- (2) Korisnik, odnosno primalac tajnih podataka, koji utvrdi da je tajni podatak nestao, uništen ili da je do njega došla neovlaštena osoba, obavezan je o tome odmah obavijestiti ovlaštenu osobu organa koji je te podatke uputio.
- (3) Ovlaštena osoba iz stava (2) ovog člana dužna je, bez odgađanja, preduzeti mjere radi utvrđivanja okolnosti i odgovornosti zbog nestanka ili otkrivanja tajnog podatka neovlaštenoj osobi, te preduzeti odgovarajuće radnje radi otklanjanja štetnih posljedica.

## Član 72.

### (Obuka o zaštiti tajnih podataka)

(1) Nakon obavljanja sigurnosne provjere, **u kojoj nisu utvrđene sigurnosne smetnje** odnosno izdavanja dozvole za pristup tajnim podacima, ovlaštene osobe proći će **obaveznu** obuku o zaštiti tajnih podataka, kako bi stekle odgovarajuće znanje, naročito o:

a) odredbama koje reguliraju pitanje zaštite tajnih podataka i zakonsku odgovornost za njihovo neovlašteno otkrivanje,

b) principima zaštite tajnih podataka u obimu potrebnom za obavljanje radnih zadataka, odnosno obavljanje dužnosti, i

c) ostalim pitanjima, koja se smatraju značajnim za ovlaštene osobe, uzimajući u obzir njihovo radno mjesto, odnosno dužnost.

(2) Organ iz člana 75. ovog zakona je izvršni predlagač u uspostavljanju programa edukacije o pitanju sigurnosti radi usmjeravanja i obuke svih ovlaštenih osoba u pogledu Zakona, ali i onih koji imaju potrebu za pristup takvim informacijama.

(3) Ovaj program prihvatit će, urediti i provesti svaka institucija ili organ koji ima potrebu za pristupom tajnim podacima.

(4) Program edukacije o pitanju sigurnosti bit će utvrđen posebnim pravilnikom koji će donijeti rukovodilac organa iz člana 75. ovog zakona.

(5) Troškove obuke snosit će institucija, odnosno organ u kojem su ovlaštene osobe zaposlene.

## POGLAVLJE V – NADZOR

## Član 73.

### (Unutrašnji nadzor)

(1) Rukovodioci organa, ministarstava, uprava, zavoda, službi, organizacija i institucija odgovorni su za organizaciju unutarnjeg nadzora nad provođenjem Zakona.

(2) U ministarstvima Vijeća ministara BiH, Oružanim snagama BiH, Obavještajno-sigurnosnoj agenciji BiH, Državnoj agenciji za istrage i zaštitu, Državnoj graničnoj službi, upravama i samostalnim državnim, entitetskim, te službama i institucijama na ostalim nivoima državne organizacije Bosne i Hercegovine, za poslove unutarnjeg nadzora nad zaštitom tajnih podataka sistematiziraju se posebna radna mjesta na koja se raspoređuju ovlašteni zaposlenici ili se uspostavljaju posebne organizacione jedinice u okviru ministarstava, zavoda, agencija, službi i institucija.

## Član 74.

### (Sadržaj unutrašnjeg nadzora)

- (1) Unutarnjim nadzorom mora se u svim državnim, entitetskim i organima na drugim nivoima državne organizacije Bosne i Hercegovine osigurati redovno praćenje i ocjenjivanje pojedinih aktivnosti na provođenju Zakona, kao i propisa i odluka donesenih na osnovu njega.
- (2) Vijeće ministara BiH detaljnije propisuje način i sadržaj unutarnjeg nadzora nad provođenjem Zakona i odgovarajućih podzakonskih propisa.

## Član 75.

### (Državni sigurnosni organ)

- (1) Vijeće ministara BiH određuje državni sigurnosni organ koje prati provođenje Zakona i drugih propisa donesenih na osnovu njega.
- (2) Državni sigurnosni organ obavlja, naročito, sljedeće zadatke:
  - a) vrši nadzor nad sigurnosnim provjerama,
  - b) izdaje dozvole za pristup tajnim podacima drugih država, međunarodnih ili regionalnih organizacija u skladu sa Zakonom ili međunarodnim, odnosno regionalnim sporazumima,
  - c) prati stanje u oblasti određivanja i zaštite tajnih podataka i brine za usavršavanje i provođenje fizičkih, organizacionih i tehničkih standarda zaštite tajnih podataka u državnim, entitetskim i organima na drugim nivoima državne organizacije Bosne i Hercegovine, kod nosilaca javnih dužnosti, te u privrednim organizacijama koje dolaze do tajnih podataka i njima raspolažu,
  - d) brine o izvršavanju prihvaćenih međunarodnih obaveza i međunarodnih ugovora o zaštiti tajnih podataka, te, s tim u vezi, saraduje s nadležnim organima drugih država, međunarodnih ili regionalnih organizacija,
  - e) brine o zaštiti tajnih podataka u državnim institucijama i organima u inozemstvu,
  - f) izdaje sigurnosne potvrde za sisteme i sredstva za prijenos, čuvanje i obradu tajnih podataka drugih država, međunarodnih ili regionalnih organizacija,
  - g) potvrđuje ispunjavanje propisanih uslova za obradu tajnih podataka od strane pojedinih organa,
  - h) izdaje uputstva za postupanje s tajnim podacima druge države, odnosno međunarodne ili regionalne organizacije,
  - i) vrši nadzor nad provođenjem fizičkih, organizacionih i tehničkih odluka za zaštitu tajnih podataka druge države, međunarodne ili regionalne organizacije i, u skladu sa saznanjima na osnovu nadzora, izdaje obavezne instrukcije za otklanjanje ustanovljenih propusta koje su organi dužni neodgodivo otkloniti,

- j) razmjenjuje podatke s državnim sigurnosnim organima i međunarodnim organizacijama,
  - k) priprema prijedloge propisa potrebnih za provođenje Zakona,
  - l) daje mišljenje o usaglašenosti općih akata o određivanju, zaštiti i pristupu tajnim podacima sa Zakonom,
  - m) koordinira djelovanje organa nadležnih za sigurnosnu provjeru,
  - n) predlaže postupke za djelotvorniju zaštitu tajnih podataka,
  - o) vrši nadzor nad kriptozastitom tajnih podataka, i
  - p) obavlja druge zadatke koji su određeni Zakonom i propisima donesenim na osnovu njega.
- (3) Vijeće ministara BiH odredit će organe za informatičku sigurnost prilikom prijenosa tajnih podataka.

#### Član 76.

##### (Nadzor)

- (1) Državni sigurnosni organ vrši operativni i tehnički nadzor u oblasti zaštite tajnih podataka nad svim institucijama i organima Bosne i Hercegovine, entiteta i ostalih nivoa državne organizacije Bosne i Hercegovine, čije nadležnosti podrazumijevaju postupanje po odredbama Zakona, odnosno čije su aktivnosti vezane za Centralni registar iz člana 62. Zakona.
- (2) O izvršenom nadzoru i njegovim rezultatima državni sigurnosni organ dužan je, najmanje jednom godišnje, podnijeti izvještaj Sigurnosno-obavještajnoj komisiji za nadzor nad radom OSABiH Parlamentarne skupštine BiH.

#### Član 77.

##### (Parlamentarni nadzor)

- (1) Sigurnosno-obavještajna komisija za nadzor nad radom OSABiH Parlamentarne skupštine BiH nadzirat će primjenu Zakona.
- (2) Komisija je, između ostalog, nadležna za:
- a) vršenja nadzora nad primjenom Zakona od strane institucija Bosne i Hercegovine, entitetskih i organa na ostalim nivoima državne organizacije Bosne i Hercegovine,
  - b) održavanje rasprave i razmatranje izvještaja Ministarstva sigurnosti BiH, odnosno Ministarstva odbrane BiH, te državnog sigurnosnog organa o izdavanju dozvola, sigurnosnim provjerama i ostalim aspektima primjene Zakona,
  - c) provođenje istraga o radu Ministarstva sigurnosti BiH, odnosno Ministarstva odbrane BiH o pitanju izdavanja dozvola, OSABiH o pitanju sigurnosnih provjera i državnog sigurnosnog

organa o pitanjima iz njegove nadležnosti, ali isključujući istrage u vezi s tajnim podacima drugih država, međunarodnih ili regionalnih organizacija,

d) za traženje od nadležnih organa iz Zakona, posredstvom predsjedavajućeg Komisije, osiguranja stručnih savjeta potrebnih za obavljanje dužnosti nadzora, i

e) ostale aktivnosti usmjerene ka osiguravanju potpunog provođenja Zakona.

(3) Tokom provođenja istrage Komisija može ispitivati sve zvaničnike, državne službenike, zaposlenike i ostale osobe koje su obuhvaćene Zakonom, te imati pristup dokumentaciji potrebnoj za provođenje istrage.

**(4) Državni sigurnosni organ izdat će članovima i zaposlenim Zajedničke komisije službenu legitimaciju radi obavljanja poslova u skladu s ovim Zakonom.**

**(5) Oblik i sadržaj legitimacije iz stava (4) ovog člana utvrdit će Državni sigurnosni organ.**

## POGLAVLJE VI - KAZNE NE ODREDBE

### Član 78.

(Kazne za odgovorne osobe)

Novčanom kaznom u iznosu od 1.000,00 KM do 5.000,00 KM kaznit će se **za prekršaj** odgovorna osoba u organu, agenciji, zavodu, službi, organizaciji i instituciji Bosne i Hercegovine, entiteta ili ostalih nivoa državne organizacije Bosne i Hercegovine ako:

a) ovlaštenu organ ne vodi evidenciju o dostavljanju tajnih podataka drugih država, međunarodnih ili regionalnih organizacija (član 28.),

b) rukovodilac organa s liste koju je utvrdilo Vijeće ministara BiH ne uputi zahtjev OSABiH u predviđenom roku (član 30.)

c) ovlaštenu organ ne vodi službenu evidenciju o izdatim dozvolama za sve osobe koje imaju pravo pristupa tajnim podacima stepena POVJERLJIVO, TAJNO i VRLO TAJNO (član 62.),

d) rukovodioci organa, organizacija i institucija Bosne i Hercegovine, entiteta i ostalih nivoa državne organizacije Bosne i Hercegovine ne vode evidenciju o dozvolama za svoje ovlaštene zaposlenike i ne pohranjuju je u poseban dio kadrovskih dosjea (član 60.),

e) ovlaštena osoba nema stalni nadzor nad distribucijom tajnih podataka i ne vodi ažurnu evidenciju iz koje je vidljivo kada i ko se s tajnim podatkom upoznao (član 68.),

f) nije uspostavljen sistem postupaka i odluka značajnih za čuvanje tajnih podataka (član 69.),

g) čuvanjem i slanjem nije osigurana zaštita tajnih podataka od pristupa neovlaštenih osoba (član 70.),



h) ne obavijesti ovlaštenu osobu o nestanku, uništavanju ili neovlaštenom otkrivanju tajnih podataka (član 71.)

i) nije osiguran unutarnji nadzor nad zaštitom tajnih podataka (čl. 73. i 74.).

#### Član 79.

(Kazne za odgovorne ovlaštene osobe)

Novčanom kaznom u iznosu od 1.000,00 KM do 5.000,00 KM kaznit će se **za prekršaj** ovlaštena osoba ako:

a) prenese ovlaštenje za određivanje podataka na druge osobe (član 13. stav (3)),

b) odredi stepen POVJERLJIVO, TAJNO ili VRLO TAJNO, a da za to nema ovlaštenja (čl. 13. i 14.),

c) ne odredi tajnost dokumentu koji nastaje spajanjem dva ili više podataka koji sami po sebi nemaju tajni karakter (član 18.),

d) ne postupi u skladu s članom 21. ovog zakona,

e) neovlašteno promijeni stepen tajnosti dokumenta, odnosno podataka (član 23.),

f) tajni dokument ne označi propisanim oznakama (član 24.),

g) ne spriječi pristup tajnim podacima osobi kojoj je oduzeta dozvola (član 58. stav (4)),

h) izda privremenu dozvolu za pristup tajnim podacima protivno odredbama člana 63. ovog zakona,

i) postupi protivno članu 67. ovog zakona.

#### POGLAVLJE VII - PRIJELAZNE I ZAVRŠNE ODREDBE

#### Član 80.

(Budžetska sredstva za provođenje Zakona)

Za provođenje Zakona potrebno je osigurati sredstva iz Budžeta institucija Bosne i Hercegovine, budžeta entiteta i ostalih nivoa državne organizacije Bosne i Hercegovine, odnosno sredstva iz budžeta svake državne, entitetske i institucije na ostalim nivoima državne organizacije Bosne i Hercegovine pojedinačno.

## Član 81.

(Provedbeni propisi koje donosi Vijeće ministara BiH)

Vijeće ministara BiH dužno je najkasnije u roku od tri mjeseca nakon stupanja na snagu Zakona donijeti provedbene propise za koje je nadležno, u skladu s odgovarajućim odredbama Zakona.

## Član 82.

(Drugi provedbeni propisi)

Svi organi, organizacije i institucije Bosne i Hercegovine, entiteta i ostalih nivoa državne organizacije Bosne i Hercegovine dužni su, najkasnije u roku od šest mjeseci nakon stupanja na snagu Zakona, donijeti odgovarajuće propise iz svoje nadležnosti i organizaciono se prilagoditi njegovom provođenju, odnosno postojeće provedbene propise i organizaciju usaglasiti s odredbama Zakona.

## Član 83.

(Osiguravanje dobivanja dozvola)

(1) Organi, organizacije i institucije Bosne i Hercegovine, entiteta i ostalih nivoa državne organizacije Bosne i Hercegovine dužni su, najkasnije u roku od 18 mjeseci od dana stupanja na snagu Zakona, osigurati da svi zvaničnici i zaposlenici, koji zbog prirode poslova koje obavljaju moraju imati pristup tajnim podacima, dobiju odgovarajuće dozvole predviđene Zakonom.

(2) Svim zvaničnicima i zaposlenicima koji ne dobiju dozvole iz stava (1) ovog člana pristup tajnim podacima mora biti onemogućen.

## Član 83a<sup>3</sup>.

**Organi, organizacije i institucije Bosne i Hercegovine, entiteta i ostalih nivoa državne organizacije Bosne i Hercegovine dužni su, najkasnije u roku od 18 mjeseci od dana stupanja na snagu ovog zakona, osigurati da svi zvaničnici i zaposleni, koji, zbog prirode poslova koje obavljaju, moraju imati pristup tajnim podacima, dobiju odgovarajuće dozvole u skladu s ovim zakonom.**

## Član 84.

(Usaglašavanje stepena tajnosti)

Dužnost ovlaštenih osoba je, tajnim podacima kojima je stepen tajnosti određen u skladu s ranijim propisima i još imaju operativnu vrijednost, promijeniti stepen tajnosti kako bi on bio

---

<sup>3</sup>Članom 34. Zakona o izmjenama i dopunama Zakona o zaštiti tajnih podataka ("Službeni glasnik BiH", broj 12/09) dodaje se novi član 83a., koji nema naziv.

usaglašen s odredbama Zakona najkasnije u roku od **tri godine** od dana stupanja na snagu **ovog** Zakona.

#### Član 85.

(Usaglašavanje stepena tajnosti za elektronske i druge podatke)

(1) Oznake stepena tajnosti nije obavezno u roku iz člana 84. ovog zakona mijenjati tajnim podacima u elektronskoj ili drugoj (nepapirnoj) formi, odnosno u tekućoj ili stalnoj zbirci dokumentacionog materijala.

(2) Tajnim podacima iz stava (1) ovog člana obaveza je oznaku tajnosti promijeniti prilikom njihove ponovne upotrebe ili stavljanja na raspolaganje drugom korisniku.

#### Član 86.

(Poređenje ranijih i sadašnjih vrsta i stepena tajnosti)

Tajni podaci iz člana 85. Zakona, u prijelaznom periodu, obrađuju se kako slijedi:

- a) podaci s oznakom DRŽAVNA TAJNA kao VRLO TAJNO,
- b) podaci s oznakom SLUŽBENA ili VOJNA TAJNA - STROGO POVJERLJIVO kao TAJNO,
- c) podaci s oznakom SLUŽBENA ili VOJNA TAJNA - POVJERLJIVO kao POVJERLJIVO,
- d) podaci s oznakom SLUŽBENA ili VOJNA TAJNA - INTERNO kao INTERNO.

#### Član 87.

(Usaglašavanje zakona u Bosni i Hercegovini)

(1) Nadležni organi u Bosni i Hercegovini dužni su u roku od šest mjeseci od dana stupanja na snagu Zakona usaglasiti odgovarajuće odredbe zakona i provedbenih propisa donesenih na osnovu Zakona, naročito u oblasti označavanja tajnih podataka.

(2) Do usaglašavanja zakona iz stava (1) ovog člana trenutno važeći propisi primjenjivat će se uporedo sa Zakonom, a u slučaju različitih rješenja, primjenjivat će se odredbe ovoga zakona.

#### Član 87a.

**(Prijelazne odredbe)**

**(1) Nadležni organi, organizacije i institucije dužni su, najkasnije u roku od 18 mjeseci od dana stupanja na snagu ovog zakona donijeti i usaglasiti postojeće provedbene propise donesene na osnovu ovog zakona.**

**(2) Nadležni organi, organizacije i institucije dužni su, najkasnije u roku od 18 mjeseci od dana stupanja na snagu ovog zakona osigurati uvjete za čuvanje tajnih podataka u skladu s Zakonom.**

#### **Član 87b<sup>4</sup>.**

**Vijeće ministara BiH dužno je u roku od 30 dana od dana stupanja na snagu ovog zakona imenovati Komisiju iz člana 14. odnosno člana 21. ovog zakona.**

#### **Član 87c<sup>5</sup>.**

**(1) Žalbe uložene protiv rješenja osoba nadležnih za izdavanje dozvola kojima je odbijen zahtjev za izdavanje dozvole za pristup tajnim podacima a koje su podnesene Zajedničkoj sigurnosno-obavještajnoj komisiji za nadzor nad radom OSABiH do stupanja na snagu ovog zakona, rješavat će se po odredbama Zakona o zaštiti tajnih podataka ("Službeni glasnik BiH", broj 54/05).**

**(2) Stupanjem na snagu ovog zakona žalbe iz stava (1) ovog člana, će rješavati Komisija iz člana 14. odnosno člana 21. ovog zakona.**

#### **Član 88.**

**(Stupanje na snagu)**

Ovaj zakon stupa na snagu osmog dana od dana objavljivanja u "Službenom glasniku BiH".

\*\*\*

**"Službeni glasnik BiH" broj 12/09**

#### **Član 37.**

**Ovaj Zakon stupa na snagu osmog dana od dana objavljivanja u "Službenom glasniku BiH".**

---

<sup>4</sup>Članom 34. Zakona o izmjenama i dopunama Zakona o zaštiti tajnih podataka ("Službeni glasnik BiH", broj 12/09) dodaje se novi član, koji ne sadrži naziv.

<sup>5</sup>Ibid